

Demonolohiya

Pang-relihiyon Nga Kahimtangan



Pila kaha ang nakahibalo niining hamubo nga awit, samtang ginapangumosta ko kamo karon nga may mainiton gayud nga Cristohanong pagpakig-fellowship ug gugma ni Cristo, pila man ang nakahibalo niining hamubo nga awit, “Siya May Kahingawa Alang Kanimo”? Kahibalo ba mo niini? Sige, tan-awon tà kung kabalo ba gyud tà niini. Kahibalo ba ka niini, igsoon? Kahibalo diay ka? Karon:

He careth for you,
He careth for you;
Through sunshine or shadow,
He careth for you.

Oh, maayo kana. Karon atong awiton kini pag-usab.

He careth for you,
He careth for you;
Through sunshine or shadow,
He careth for you.

[Blangko nga bahin sa teyp—Ed.]

² Langitnon namong Amahan, ginapasalamatan Ka namo tungod nga may kahingawa Ka alang kanamo ug gipadayag ang Imong gugma nganhi kanamo, nga tungod niana gipadala Mo ang Kaugalingon Mong pinalanggang Anak, aron...ang walay-sala nga Anak sa Dios, aron angkonon ang dapit sa sad-an nga mga makasasala. Ginapasalamatan Ka gayud namo, nga nagkahingawa Ka kanamo ug naghunahuna gyud kanamo, aron buhaton kini! Ug mapasalamaton kaayo kami, Ginoo. Malipayon sàb kami nga magkatigum dinhi niining hapon, ilalum sa mga atop sa kalangitan, ug among ginapangamuyo ang Imong mga panalangin alang niini nga buluhaton. Itugot, Ginoo, nga ang matag lalaki, babaye, batang lalaki o batang babaye nga ania, karon hinaut nga magtuon gayud sa mga Kasulatan. Ingon nga nagaatubang kami sa usa ka kalibutan nga kontrolado ni Satanas. Ug, Amahan, ginaampo namo, samtang among pagatun-an ang bahin sa gahum sa mga demonyo ug sa kung unsa ang ginabuhat nila sa mga tawo, hatagan Mo unta kami og dakung pagtoo, ug hinaut nga daghang dagkung mga ilhanan ug mga katingalahan ang mamahitabo. Kay, amo kining ginapangamuyo sa Ngalan ni Cristo ug alang sa kahimayaan sa Dios. Amen.

³ Moadto kita, sa atong pagtuon karong hapon, sa gilayon, nga sa hunahuna ko, mora'g sayo-sayo tà og mga kinse minutos. Kini'y mahitungod gihapon sa *Demonolohiya*.

⁴ Ug bueno bag-o lang kong nakadawat og mensahe, kaganina; Igsoong Beeler, gikan sa akong mga higala. Ug magsugod ako og byahe sa Africa, sa tunga-tunga sa Hulyo. Busa mao na kana, amo na kanang gitakda. Ug dili man makauban si Igsoong Baxter nianang higayona, mao nga mag-inusara lang ko nga moadto sa Africa. Hinoon moadto man ko didto tungod sa . . . hinaut nga ang . . . Iampo ninyo ako karon, nga tabangan ako sa Ginoo, tungod kay gikinahanglan ko gayud kana, para didto sa taliwala . . . Ngani nagalaum ako og dili mominus sa duha ka gatus ka libo ka tawo ang maanaa niana nga panagtigum.

⁵ Ug aduna ako'y usa ka panan-awon nga naisulat ko dinhi. Buut ko nga inyong madawat ang benepisyo niini. Nahitabo kini niadtong Disyembre. Anaa ako sulod sa lawak usa niadto ka buntag sa diha nga misulod ang Manulonda sa Ginoo. Ako . . . Nakita n'yo, sa dihang atua ako didto, gisupak man gud nako ang Dios, ug mao nga natakboyan ako og ameba. Ang si kinsa man nasayod—nasayod gyud kung unsa ang ameba, usa ka kagaw nga nagasulod . . . halos mopatay na kanimo. Ug tungod kay gibuhat ko ang usa ka butang nga gisulti kanako sa Dios nga dili unta buhaton. Pila man ang nakadungog na sa estorya bahin niini? Pipila man siguro kaninyo dinhi. Kabalo ko nga ang mga kaigsoonan nga taga didto sa tabernakulo nakadungog na sàb sa maong estorya bahin sa kung unsay nahitabo. Giingnan man gud ko sa Dios nga moadto sa usa ka lugar, ug mopahilayo sa *niini* nga lugar, ug aron nga makabalik unta ngadto sa usa pa ka lugar. Pero gitugotan man hinoon nako ang mga magwawali nga makumbinsi ra ko nga dili sà moadto. Bueno, buutan man ang maong mga magwawali, ug mga igsoon ko sila, apan kinahanglan sundon mo gayud kung unsay gisulti sa Dios kanimo. Tinuod kana. Kita n'yo? Tungod aduna man ka'y usa ka misyon.

⁶ Pila man ang nakahinumdum nga usa niadto ka higayon adunay duha ka propeta sa Biblia? Ug ang usa kanila, gisultihan siya sa Ginoo, ang ingon, “Umadto ka sa *usa* ka dapit. Ug ayaw—ayaw gyud pag-adto sa . . . Bumalik ka sa lahi na nga dalan,” ug uban pa. Ug—ug miingon, “Ayaw pag-kaon o pag-inom samtang atua ka didto.”

⁷ Ug gihinagbo siya sa usa pa ka tinuod nga propeta, ug miingon, “Gihinagbo ako sa Ginoo human nga nakigttagbo Siya kanimo.” Ug miingon, “Agi ka sa akong balay.” Ug nagpatalinghug ang maong propeta sa gisulti sa laing usa pa ka propeta, ug nawad-an siya og kinabuhi tungod niadto. Kita n'yo, mao nga sundon mo gayud ang gisulti sa Dios kanimo nga pagabuhaton bisan unsa pa'y isulti ni kinsa man.

⁸ Karon kita’y . . . Sa niini nga panan-awon, Siya . . . Napukaw ako niini, niadtong ika-trese sa Septyem- . . . o Disyembre diy. Ug—ug samtang nagalingkod ako sa may kilid sa akong higdaanan, naghunahuna ako kung unsa kaha ang mamahitabo kanako sa umalabot. Ako . . . Sa pagbalik nako dinhi, andam na sila nga ipahimutang ako sa kuwarentina, tungod halos giut-ot na man ko sa mga kagaw. Ug ila akong gieksamin sa pag-abot mismo nako dinhi sa nasud. Ug, tungod sa grasya sa Dios, ila na lang akong gipapauli, tungod kay mikuyanap na man og ayo ang maong mga kagaw. Ug nag-ampo ako, ug akong giadtoan kadtong mga ministro, ingon ko, “Giingnan na ko sa Ginoo nga dili moadto didto.”

Miingon pud, “Oh, nagapakigsulti sàb baya ang Dios ngadto sa uban gawas kanimo.”

⁹ Ingon ko, “Aduna usab si Korah og ingon-anang panghunahuna kaniadto.” Ug busa, apan miadto ako ug mikuha og pipila ka dahon ug gibutang kadto sa ilang mga tiil, ug miingon ko, “Timan-i n’yo, sa Ngalan sa Ginoo, kung mobiyahe gyud tà didto, nan mamahimo lang kana nga pagkapakyas, ug magbayad gayud kitang tanan tungod niana.” Ug tinuod gyud! Oh, grabe! Kaming tanan hapit gyud bitaw nga mamatay. Busa sa pagbalik na . . .

¹⁰ Pagkadaghan kaayo nga angay mong pakigbisogan sa niining ubang mga nasud. Pananglitan, kon dunay usa ra ka gamay’ng pulgas ang nakapaak kanimo, nan maghinungdan kana nga magkaaduna ka og balik-balik nga hilanat. Ug kana nga gamay’ng insekto, pag nakapaak na kana kanimo, bisan pa kung mabati nimo nga nangatol ka na, dili nimo puedeng katolon kana. Tan-awa sà, kung usa gani kana ka gamay’ng itum nga pulgas, ayaw kana biraha. Tungod gamay man gud ang ulo niana, mokutkot kana pasulod mismo sa panit, motuyok nga nakaingon *niini* ug motaput gyud og ayo. Mao nga kung imo kanang birahon, basin unya’g mahibilin dinha ang ulo. Anaa man gud diha ang virus niana, nga mahimong moparalisa kanimo. Busa kana . . . Ayaw gyud og katola, o ayaw kana biraha; kondili pagkuha lang og lana. Ug nagaginhawa man gud kana pinaagi sa iyang likod. Patulo-i kana og lana, ug mohawa ra kana.

¹¹ Dayon aduna pu’y usa ka gamay’ng lamok. Dili siya magsaba-saba bisan gamay. Mohagong ra siya diha sa kahanginan. [Gidagpi ni Igsoong Branham ang kaugalingon niyang kamot—Ed.] Igo lang siyang motugdon kanimo, kana lang, og nagkaaduna ka na diy og malaria.

¹² Ug—ug dayon aduna pa gyu’y ginatawag nilang mamba nga bitin. Kung mapaakan kamo niana, mabuhi na lang kamo og mga dos minutos human nga mapaakan mo niana.

13 Ug aduna pu'y dalag nga cobra. Mabuhi na lang kamo og mga kinse minutos human sa pagkapaak niana. Ug ngani ang usa kanila halos haduol na kaayo sa akong anak, nga hapit na niyang mahikapan ang ulo niini. Hapit na unta, mopaak, sa wala pa namo napusil ang maong bitin, nga sama niana.

14 Ug aduna pa diay og itum nga cobra. Oh, tanan na atua didto! Ug dayon aduna sab didto ang mga peligro tungod sa lasangnon nga mga mananap, siyempre, ang mga leon, tigre, o mga leopardo, ug tanan nang uban pa nga pakigbisogan mo, didto sa kalasangan. Ug dayon aduna pa ang mga sakit, tanan nang matang sa mga sakit aduna didto.

15 Ug sagubangon mo gayud kana tanan kon nagapangmisyon ka. Gawas pa niana, duna pu'y barangan nga mohagit kanimo sa bisan asa, kita n'yo, ug tanan nilang mga too-too ug mga ingon-anang butang. Apan, daw sa, pagka-kahibulongang butang gayud nga makita ang Ginoo nga ginapanghapak kana palayo, gikan sa usa ka bahin ngadto sa usa ka bahin, nga ingon niana, pagkahuman magpadayon na.

Ug niadtong adlaw mahinumduman ko pa, gayud, samtang atua didto, kung unsa ang nahitabo, sultihan ko ra kamo sa umaabot nga higayon sa usa na usab ka panagtigum, tungod kay gusto kong maghisgot na sa akong hilisgotanan niining hapona, mahitungod sa *Demonolohiya*.

16 Apan karon, ug kini ang gihunahuna ko, samtang nagalingkod ako dinha, kung unsa kaha ang mamahitabo sa katapusan? Ug sa pagbalik ko ngadto sa ubang nasud, nasayod ko nga nagkaaduna kami og usa ka gatus ka libo nga mga nakabig samtang atua kami didto. Ug miduol kanako ang tigulang nga si Igsoong Bosworth. Miingon, miingon ko, "Bueno, Igsoong Bosworth?"

17 Ingon siya, "Nahimuut kaayo ko kanimo, Igsoong Branham!" Ingon pa siya, "Igo ka pa lang—anaa ka pa lang gani sa sinugdanan sa kinabuhi," ang ingon niya.

18 Ingon ko, "Bueno, tapos na man gani ni siguro." Ingon ko, "Lagpas na ako og kuwarenta anyos. Sa tan-aw ko nakapakigbugno na ako sa maayong pakigbugno ug natapos ko na ang lumba."

19 Ingon siya, "Lagpas kuwarenta anyos?" Miingon, "Mao pa lang kana ang akong edad sa wala pa ako kaniadto nakabig." Ingon pa, "Hangtud karon lagsik pa man gihapon ko." Halos mag-otsenta anyos na siya niadtong tungora. Ug basta . . .

Nahunahuna ko, "Bueno, tingali'g husto kana."

20 Busa ingon siya, "Dili, usa pa lamang ikaw ka bag-ong Branham karon. Mas nahibalo ka lang karon kung unsaon sa pagdumala ang imong mga panagtigum, ug tanan na." Ingon pa, "Kung makasangyaw lang ka sa Amerika sa husto nga paagi, nga

may insakto nga mapahilunaan sa panagtigum, kon diin puede ka nga magpabilin sulod sa unom o walo ka semana sa usa ka lugar, ug ihan-ay kana ug ipahibalo sa tibuok lugar,” miingon, “aduna gyud ka’y mabuhat, bueno, alang sa atong Ginoo.” Busa nagpadayon kami, nga ingon niadto, ug pagkamaanindot gayud—gayud niadto.

²¹ Dayon wala magdugay, nakakita ako og usa ka panan-awon, sa dihang anaa ako sa Amerika, ug miabot kanako, nga ginapabalik ako sa Africa, ug gipakita niini kanako ang mao gihapon nga panagtigum, nga gipahigayon didto sa atubangan sa Durban. Ug nahuman na man ang unang panagtigum ingon nga mipaingon na sa kasaysayan, og padulong na sàb sa Kasadpan. Gipakita ang ikaduhang panagtigum ug, sa dihang gipakita kini, kini’y mas daku pa kaysa unang panagtigum. Ug Siya . . . nakadungog ko og usa ka singgit, ug may usa ka Manulonda nga nagakunsad gikan sa Langit; may dala Siyang dakung kahayag.

²² Ug ang Manulonda sa Ginoo nga ania dinhi kanato karon, atu- . . . nga kanunay’ng ania sa akong tuo, dinhi *niining* dapita. Ug atua Kini didto, ug Kini’y—nagatuyok-tuyok Kini. Ug nakita ko kining Tawo nga nagatindog sa may ubos Niya. Siya’y—Siya’y dili . . . Bueno, dili na kini panan-awon pag makita mo na Siya. Ingon ingon na gayud kini ka tinuod sama ra nga nagatan-aw kamo kanako. Aba, madungog mo mismo Siya nga nagalakaw ug nagapakigsulti kanimo. Ug sa dihang Siya . . . Kung unsa man, ingon gayud kadto ka tinuod. Ug dili na kadto usa ka panan-awon; tungod ang maong Tawo atua mismo didto sama gayud kaninyo. Ug ang Iyang tingog ingon ka klaro gayud sama sa akong tingog o sa inyong tingog. Hinoon ang panan-awon, usa ka butang man sàb nga motungha sa atubangan mo ug makita mo kini, sama niana. Pero kining maong Tawo miduol gayud ug mitindog didto.

²³ Bueno giingnan Niya ako nga . . . sa kung unsa ang mahitabo. Ug miingon Siya nga ang . . . mikanaug Kining Manulonda, ug Iya akong giingnan nga molingi ug motan-aw sa *niini* nga direksyon. Ug mora kadto og paingon sa India, gani. Wala ko ginaingon nga sa India mismo, pero mga didto dapita. Ug sila’y mga tawong taga-India.

²⁴ Tungod kay, ang mga Aprikano dagkuon man, maskulado, og tambokon nga mga tawo. Ngani ang uban kanila halos pito ka piye ang katas-on, ug motimbang pud, oh, og duha ka gatus ug otsenta, tulo ka gatus ka libra, dagkuon gyud. Ang mga Zulu, bueno, ang mga Shunghi ug mga Basuto usab, ug, oh, aduna pa’y daghang nagkalainlaing mga tribu. Aduna gani kinse ka nagkalainlaing mga tribu ang atua didto niadtong adlaw, nga akong giwalihan.

²⁵ Mao nga pag mosulti ko og usa ka pulong, sama sa, “Si Jesus Cristo, ang Anak sa Dios.” Makahimo pa ko sa pag-inom og

tubig adisir kini mahubad sa tanang mga maghuhubad. Ang usa moingon. . . Ug tanan na nga kabanha!

Ginahunahuna ko kaniadto, pag madungog ko ang mga Pentecostal nga nanagsulti og laing mga pinulongan, nga ang usa tingali nagasulti og usa ka matang sa tingog ug ang usa usab nagasulti pud og lahi, unsaon kaha pagkahimo niana? Apan nagatoo ko nga husto ang Biblia, ug nasayod nga husto gyud Kini, sa dihang miingon Kini, “Walay ni usa ka tingog nga walay kahulogan.” Tinuod kana.

Ang uban kanila moingon, ang usa kanila moingon, “Blrr blrr blrr blrr,” nagakahulogan kana nga “Si Jesus Cristo, ang Anak sa Dios.” Ang usa usab moingon, “cluk cluk cluk cluk,” ingon nga “si Jesus Cristo, ang Anak sa Dios,” sa iyang pinulongan. Busa bisan unsa pa kana nga matang sa tingog, aduna kana’y kahulogan sa kon asa man. Tinuod. Bisan unsa pa kana nga matang sa kabanha, nagakahulogan kana og usa ka butang para sa usa ka tawo sa kon asa man. Ug sa dihang Siya. . . Ila kadtong isulti pag-usab.

²⁶ Ug akong namatikdan nga dapit sa akong wala, sa dihang mikanaug kadtong Manulonda nakakita ko og usa ka mora’g dakung panon didto, ug mga tawo sila nga may. . . mora’g nakatapis sila og usa—usa ka habol, ingon *niini*, nga nakatapis ug ginahigot ra, sama sa usa ka gamay’ng bata nga ginaputos, og lampin. Ug mao kadto. Ug akong nakita kutob sa pinakahalayo kong makita, walay lain kondili mga tawo. Ug dayon kining Manulonda nagpasiga og usa ka dakung nagakidlap—kidlap nga kahayag, ug hinay-hinay nga nagalibot-libot, nga sama *niana*. Ug wala pa gyud ko nakakita og ingon kadaghang mga tawo sa tibuok kong kinabuhi!

²⁷ Ug dayon kining usa pa ka Manulonda mipaduol og ayo kanako, ug miingon Siya, “Adunay tulo ka gatus ka libo kanila sa niana nga panagtigum.” Ug ako kining gisulat dinhi. Ug isulat n’yo usab kini sa usa ka matang sa papel, sama sa akong gisulti mahitungod sa batang lalaki nga nabanhaw didto sa Finland. Isulat n’yo kini diha sa blangko nga panid sa inyong Biblia o kon asa man, nga sa niining maong panagtigum (Magkaaduna gyud og usa ka panagtigum. Ug inyo kining mabalitaan pinaagi sa usa ka pagsibya.) dunay tulo ka gatus ka libo ka tawo ang manambong niini nga panagtigum. Bueno, hibaloa n’yo kung dili ba kana matinuod. Mamahimo kanang tulo ka pilo ang gidaghanon kaysa niadtong nauna. Kita n’yo? Tulo ka gatus ka libo ka tawo ang manambong sa maong panagtigum. Ug mao nga nalipay gyud kaayo ko nga makaadto og makadangat didto, wala ako kahibalo kung unsay buhaton, pero ginatinguha ko gayud nga mangkabig og mga kalag alang sa atong Ginoo.

²⁸ Ug didto, sa usa ra ka higayon, nakita—nakita ko nga dunay traynta ka libo nga puro mga pagano ang mangduol kang Jesus

Cristo sa usa ra ka pagtawag sa altar, dunay traynta ka libo nga puro mga pagano.

²⁹ Karon moadto na tà sa gilayon sa atong hilisgotanan. Kagahapon atong gitun-an ang pamaagi sa mga demonyo. Nakahunahuna ko karong adlaw, samtang nagapakigsulti ang Dios. Kung nasayod lang kamo kon daw sa unsa nga kagawasan ang makapahayag. Bueno, dili baya ko usa ka magtutudlo. Halayo ra kaayo ko sa usa—usa ka tigpasabot sa Biblia. Ug ako’y. . . Ngani ang akong edukasyon taman ra man sa ikapitong grado. Busa kana’y. . . Ug, mao kana, miundang ako sa pag-eskwela mga baynte-singko na ka tuig ang milabay, busa dugay na kaayo nga panahon kadto. Ug wala gayud ako’y hataas nga edukasyon, mao nga ang tanan kong nahibaloan nadawat ko pinaagi’g inspirasyon. Ug kung ang maong inspirasyon dili nagakatakdo sa Biblia, nan sayup kana. Kita n’yo? Kinahanglan nga takdo gyud sa Biblia. Bisan unsa pa kini nga inspirasyon, kinahanglan nagagikan kini. . . *Ania* ang pundasyon nga iya sa Dios. Wala na’y ubang pundasyon nga gikapahimutang kondili Kini lamang. Ug kung unsa Kini, kung ang akong isulti sukwahi man Niini, nan ang akong mga pulong bakak, tungod kay Kini man mao ang Kamatuoran. Kita n’yo? Kita n’yo? Ug kung ang usa ka manulonda magasulti kaninyo og usa ka butang nga lahi kaysa Niini, ang ingon ni Pablo, “Isipa siya nga usa ka tunglo,” bisan pa ang usa ka manulonda sa Kahayag. Karon, daghan pang dagkung mga butang. Ako lang. . . ang bugtong. . . naggahin ko og duha ka adlaw, aron nga hisgotan kini nga hilisgotanan para sa mga tawo, kagahapon ug karon, nga pang-hapon nga mga panagtigum.

³⁰ Bueno, ang hinungdan nga gibuhat ko kini, aron akong sulayan og tan-awon kung tabangan ako sa Dios. Aduna gyu’y butang sulod sa akong kasingkasing. Ug mao kini, nga, human niining halangdong Mensahe, ug human nga panghimatud-an sa Dios Mismo ang akong ginasulti nga mao ang Kamatuoran, sa Iyang Pulong; pinaagi sa Iyang Pulong, una, ug pagkahuman pinaagi’g mga ilhanan ug mga katingalahan. Karon, sa hunahuna ko, ingon nga adunay Ebanghelyong Kamatuoran para sa Iglesia, obligado ako, sa Dios, nga ihatud kini ngadto sa Iglesia. Tinuod kana. Tungod sila’y nagkabahin-bahin na gayud, sa daghan kaayong nagkalainlaing mga organisasyon ug pang-sekta nga mga bahin niini, nga sayup gayud. Kitang tanan mga anak man sa Dios sa dihang matawo na kita pag-usab, Ingon-niana, kita n’yo. Ug ang kamatuoran bahin sa maong butang mao’y gusto sa Dios nga masayran gyud nato kini, nga kita’y Iyang mga anak.

³¹ Karon, hinumdumi, nga ang templo ni Solomon gihulma sa materyales nga gikan pa, sa tibuok kalibutan. Ug ania miabot ang usa ka bato nga giporma nga nakaingon *niini*, ug may usa pud ka bato nga giporma nga nakaingon *niana*, ug may usa nga

gitapyas nga nakaingon *niini*, ug may usa pud nga gitapyas nga nakaingon *niana*, apan, sa dihang giporma na kini sa tingub, wala gyu'y nahitabo ni hagonghong sa gabas, ni tingog man lang sa martilyo, tungod ang tanan mihaum mismo sa puwesto niini. Ang Dios mao ang Magtutudlo nga mamaingon niana.

³² Ang Dios adunay iglesia nga gitawag og Assemblies, ug duna pu'y usa nga church of God, ug may usa nga *ingon-ani*, ug duna pu'y usa nga *ingon-ana*. Ug, apan kon magkahiusa silang tanan, mamahimo silang usa ka dakung pundok nga may gugmang inigsoon, ug ipahimutang sa Dios, og tipunon ug lalinon kana nga Iglesia paingon sa kawanangan.

³³ Ang tanang bantog nga hulagway, sa dili pa kana isab-it diha sa pasilyo sa art, kinahanglan kanang maisab-it, moagi sa pasilyo sa mga kritiko, una. Ang lalaki nga nagpinta...?..., o, pasayloa ko, dili ko lang madumduman ang iyang ngalan, sa nagpinta niadtong Katapusang Panihapon, bisan pa man, gigahin gyud niya ang tibuok niyang kinabuhi para niana. Siya ang nagpinta siya niana nga hulagway. Ngani mga baynte pud ka tuig, o napulo ka tuig, sa hunahuna ko, ang gintang sa iyang pagpinta kang Cristo ug kang Judas. Ug kabalo ba mo, nga sa nianang bantog nga hulagway, ang mao ra nga lalaki nga miposing ingon nga Cristo, human sa napulo ka tuig miposing na pud ingon nga Judas? Tinuod kana. Mao gayud. Napulo ka tuig sa sala, gikan sa pagka-bantugang mag-aawit sa opera, miposing ingon nga Cristo, sa miposing na usab para kang Judas. Dili man ninyo kinahanglan og napulo ka tuig. Bisan diyes minutos ra, mao man gihapon ang epekto kaninyo. Pagausabon niini ang inyong kinaiya, diha sa sala. Apan, bisan pa man, ang maong hulagway miagi sa gyud sa tanang mga kritiko.

³⁴ Ug ingon niana usab ang ginahunahuna ko mahitungod sa Iglesia sa Dios, ang pundok nga tinawag. Bueno, wala ko ginatuyo kini ingon nga unsa mang pagsaway. Nalawig na man nako ang pito ka kadagatan, ug ngani anaa na ako sa ikatulo kong pagbiyahe sa tibuok kalibutan, ug nagaingon ang mga tawo, "Holy-roller! Holy-roller!" Ug ako nang nalibot ang kalibutan, pero wala pa man ko nakakita sukad-sukad og usa ka holy-roller. Usa man gud kana ka ngalan nga ginabansag lang sa yawa nganha sa mga tawo. Kana lang. Wala gyu'y ingon-anang butang nga sama sa usa ka holy-roller. Ug aduna pud ko'y estatistika nga sa matag unom ka gatus ug saysenta'y-otso ka nagkalainlaing mga iglesia, nga naorganisa sa kalibutan, wala gayud ni usa man sa mga niini ang gitawag og mga Holy Roller. Ug gikan kana sa gobyerno. Wala gyud ni usa ka Holy Roller nga iglesia nga akong nahibaloan. Busa, butang lang kana nga gibansag sa yawa. Apan, karon, bisan sa tanan niini, niining tanan nga mga butang, nagpinta ang Dios og usa ka hulagway. Ug usa ka higayon kining gagmay'ng karaan nga mga kaiglesiahan atua sa gawas kaniadto, pipila kaninyo...

³⁵ Ginatan-aw ko kining ubanon na nga mga kalalaken-an. Ang anak kong lalaki, kagahapon; samtang atua ako sulod sa lawak, nagatuon, ug may usa ka ministro nga miduol ug miingon, “Gusto ko untang makiglamano sa imong papa.” Siyempre, ang akong anak ingon nga nagdaku siya kauban sila ni Igsoong Baxter, nga moingon og, “Dili,” ingon-ana, sa gilayon. Pero dili man ko gusto niana. Kita n’yo? Bisan pa kung ako. . . . Siyempre, dili man ko puede mahimong alagad sa tawo ug sa Dios, usab. Apan sa ako lang gusto ko gayud nga makiglamano sa akong mga kaigsoonan. Gusto kong buhaton kana. May sa kung unsang butang gyud, nga gusto kong makiglamano sa usa ka—sa usa ka ministro. Dili lang sa usa ka ministro, kondili sa bisan kinsa man nga anak sa Dios, gusto kong buhaton kana. Ngani wala ako mahibalo bahin niini hangtud nga giingnan ko sa akong asawa wala magdugay human niadto. Bueno, kung gisultihan niya unta kadtung ministro, “Kadali lang, anaa pa man gud siya didto nag-ampo, ug—ug hibaloon ko una kung unsay iyang isulti.” Bueno, kana, mas maayo unta kana. Mao nga medyo ako siyang gisultihan bahin niana, nga dili na buhaton ang ingon-ana. Kita n’yo?

³⁶ Ug hinoon tinuod man, dili nga puede ka na lang duolon basta-basta, sama sa giingon sa maong igsoon kaganina. Kay kung buhaton mo kana, nan pagkagabii ako—ako’y mamahimong hago na kaayo, nakita n’yo. Makig-istorya gyud baya ang mga tawo, ug ang matag usa nga tingali adunay sakit, ug pag maghisgot na sila mahitungod niana, sa gilayon, anaa man gud ang Manulonda sa Ginoo dinha mismo para mosulti mahitungod niana.

³⁷ Ngani adunay usa nga nagalingkod, nagalantaw siya mismo kanako karon, ang nasayod nga tinuod kana, pipila pa lang ka minutos ang milabay, o mga usa na ka oras ug tunga ang milabay. Aniay usa ka gining nga nagalingkod dinhi, nga wala pa nakahibalo kung unsa kadto, niadtong ang Manulonda sa Ginoo nakigsulti kaniya sa miaging gabii ug adunay gisulti kaniya, ug wala pa siya makasabot niadto. Apan karong adlaw nahitabo na man kini, busa nasayod na siya karon kung unsay buut ipasabot niadtong nakigsulti ang Manulonda kaniya. Ug samtang, nagatindog ko dinha nga nagapakig-istorya kaniya, miabot mismo ang Manulonda sa Ginoo ug gisultihan siya kung unsay iyang sakit, ug kung unsa gayud kini, ug—ug kung unsay ginahunahuna niya, ug sa usa sa iyang mga minahal sa kinabuhi, ug nakigsulti gyud ang Dios ug miingon nga panghimatud-an Niya kini, ug kung unsa ang mamahitabo. Busa eksaktong ingon niana gayud ang mahitabo. Kita n’yo? Gisulti na man gud sa Dios.

³⁸ Bueno, karon, unsa pa kaha ang pipila ka mga higayon nga. . . . Dayon, ug ang matag panan-awon makapaluya gyud og ayo kanimo, kita n’yo. Ug mahibaloan mo na lang, pagmoadto

na ka sa simbahan inig ka gabii, hago ka na gyud kaayo hangtud nga dili ka na halos kahibalo kung unsay buhaton. Ug mao nga iampo n'yo ako karon, kita n'yo, tungod kay gikan sa usa ka panagtigum may usa na man usab, og usa na usab. Kon kini lang pud ang panagtigum, nan mamahimong lahi unta, kung mouli na ako karon ug walay buhaton sulod sa duha ka bulan, kondili mogawas ra ug dalhon ang akong igpamasol ug mamingwit. Apan kinahanglan nakong motambong sa usa ka panagtigum dayon ngadto sa usa na usab, gikan sa usa ka panagtigum dayon ngadto sa usa na usab, nakita n'yo. Mao man kana ang angay'ng buhaton.

³⁹ Ug mag-ampo kamong tanan, kamong mga ania karon nga mga mananambong. Giingnan nila ako kagabii nga ako—nga duna kono ako'y ginaestorya nga usa ka tawo, pero ang maong tawo wala man nagpatalinghug sa maong pagtawag. Bueno, medyo delikado baya kana, nakita n'yo. Sa dihang giingon nila kini... Bueno, usahay dili nagadan-ag kining mga kahayag, tungod aduna ma'y mangitngit nga bahin dinha sa taliwala.

⁴⁰ Ug akong ginatan-aw ang Manulonda sa Ginoo pag ania na Siya dinhi, mabati ko man kini. Dayon mabati ko Kini nga mobalhin gikan kanako, ug akong mamatikdan, nga mohawa Kini kanako ug moadto Kini sa kon asa man ug magpabilin dinha sa makadiyut, ug ako Kining makita. Ug mosiga Kini ug dihay motungha nga usa ka panan-awon. Dayon akong makita ang maong panan-awon. Tan-awon ko kung unsay hitsura sa matang sa tawo nga anaa dinha. Pag makita ko na ang maong tawo, dayon mosulti na ako. Ingon-ana ang nagakahitabo. Ingon-ana gyud ang nagakahitabo. Hinoon dili man nimo kinahanglan nga isulti kana sa tanang tawo, apan kana'y—mao gyud kana ang nagakahitabo, nakita n'yo. Anaa man gud kining tanan sa espirituhanon nga kahimtangan.

⁴¹ Dayon kung kana nga tawo dili gani motubag, nan mamahimong sama ra kana nga nagabasa ka og Biblia dinhi ug moingon, “Wala ma'y pulos Kini,” og talikdan ra Kini. Kita n'yo? Busa dili gyud kana maayo. Mao nga magmaigmat, maminaw, og magmabinantayon gayud. Sa diha nga magpakigsulti Siya, tumubag ka. Kita n'yo, basta magmainandamon gayud nga motubag sa unsa mang higayon.

⁴² Ug busa ang akong asawa, ug si Igsoong Beeler ug daghan kanila, kaganinang buntag, ang nagsulti kanako mahitungod niini, nga ginatawag niadto ang usa ka lalaki mahitungod sa iyang igsoon, sa kon asa man, nga aduna pud og problema kaniya, ug uban pa. Ug ang maong lalaki wala man mitubag sa pagtawag, busa dili na kana matabangan. Anaa na kana tali sa Dios ug sa maong lalaki. Mibiya na lang kanako ang maong panan-awon. Dayon wala ko na kadto makita, tungod kay wala man siya mitubag. Busa, magmabinantayon gyud, og magmaigmat.

43 Karon hisgotan ko kining hilisgotanan mahitungod sa *Demonolohiya* ug hisgotan ang mahitungod sa mga demonyo. Bueno, ang mga tawo, pagmoingon ka og “demonyo,” dihadiha mismo mosugod silang maghunahuna, “Oh, usa ra kana ka panatisismo o ingon niana!” Pero ang mga demonyo baya ingon ka tinuod gayud sama sa mga Anghel. Sila’y ingon ka tinuod gayud.

44 Ug ang yawa ingon ka tinuod gayud nga yawa, maingon nga si Jesus Cristo mao ang Anak sa Dios. Ang yawa usa gyud ka yawa! Ang Langit usab ingon ka tinuod gayud. Ug kung walay ingon-anang butang nga sama sa impiyerno, nan wala pu’y butang nga sama sa Langit. Ug kung walay Eternal nga gipanalanginang. . . Eternal nga silot, diay, nan wala pu’y Eternal nga gipanalanginang lugar. Kung walay adlaw, nan wala pu’y gabii. Kita n’yo? Apan sa ingon ka sigurado nga adunay adlaw, nan aduna gyu’y gabii. Sa ingon—ingon ka sigurado nga adunay usa ka—sa ingon ka sigurado nga adunay usa ka Cristohanon, nan aduna usab usa ka hipokrito. Sa ingon ka sigurado nga adunay usa ka tinuod nga tawo sa Dios, aduna pu’y tawo nga magsundog-sundog niana. Kita n’yo? Eksaktong aduna gyu’y pag-uyon ug pagsupak, itum ug puti, mao sab mismo sa tanang aspeto sa kinabuhi, dunay tinuod ug duna pu’y mini sa bisan asa gayud. Ug kon adunay usa ka mini nga ebanghelyo, nan aduna gyu’y usa ka tinuod nga Ebanghelyo. Adunay usa ka tinuod nga Bautismo, aduna pu’y usa ka mini nga bautismo. Adunay paaron-aron lang nga pagtoo, ug aduna pu’y tinuod. Adunay usa ka tinuod nga dolyar sa Amerika, aduna pu’y usa ka mini nga dolyar sa Amerika. Adunay usa ka tinuod nga Cristohanon, aduna pu’y usa ka tinuod nga hipokrito, kita n’yo, nga nagaawat-awat lang. Busa makita ninyo kana, ug magkauban kana sila mismo. Ngani, dili nato silang mahimong bulagon. Tungod kay nagapaulan man ang Dios.

45 Tugotan Niya unta ako nga magsulti dinhi sa makadiyut lang. Pila ba ang mga magwawali nga ania dinhi? Ipataas ang inyong mga kamot. Ang tanan-tanan nga, mga magwawali, tanawon ta ang inyong mga kamot. Bueno, panalanginan kamo sa Dios, mga igsoon. Karon, bueno, ayaw baya ninyo hunahuna kina ingon nga doktrina ha, apan, sa dili pa nato hisgotan kining importante nga hilisgotanan, sultihan ko usa kamo. Pila ba ang mga Pentecostal nga ania dinhi? Ipataas ang inyong mga kamot, ang tanan sa kon asa man. Bueno, mga Pentecostal man diay kamong tanan. Oo. Sultihan ko kamo sa kung unsay akong nasaksihan kaniadtong una kong pagdangat taliwala sa inyong, pundok.

Ania ako kaniadto dinhi mismo sa Indiana, sa usa ka lugar nga gitawag og Mishawaka. Ang unang grupo sa mga Pentecostal nga akong nahimamat, gitawag sila nga—nga Pentecostal Assemblies of Jesus Christ, sa hunahuna ko, o

mora'g ingon niana, pagkanindot gyud nga pundok sa mga tawo. Karon organisado na sila ug gitawag na sila nga United Pentecost. Mibulag sila sa tanang uban pa kanila, tungod sa hisgotanan mahitungod sa bautismo sa tubig. Hinoon wala kana nagapahimo kanilang hipokrito. Tungod daghan ma'y mga matuod, tinuod og matuod nga iya-sa-Espiritu Santo, mga natawo na pag-usab nga Cristohanon diha sa ilang mga grupo. Ug gihatag kanila sa Dios ang Espiritu Santo pinaagi sa pagpabautismo sa "Ngalan ni Jesus," ug gikahatagan pud ang uban og bautismo sa Espiritu Santo, pinaagi sa pagpabautismo gamit ang "Amahan, Anak, Espiritu Santo." Busa, "Ginahatag sa Dios ang Espiritu Santo, kanila nga nagasunod Kaniya," mao nga si kinsa—si kinsa ba, si kinsa man ang nanagsunod Kaniya? Mao kana.

⁴⁶ Kung hikalimtan lang unta ninyo, ug sila nga gustong mamahimong lahi, pasagdi ra sila, ug magpadayon lang mo ug mag-inigsoonay. Kana lang. Ayaw'g. . . Ang nagpahinungdan man gud niini, mao'y tungod nga nagkabahin-bahin na sila, nagkabalag-bulag na. Kita n'yo na? Unsa? Pagkabahinbahin, pagkabungkag, pagkaguba sa pagkamanagsoon, paggawas ug pagbulagbulag sa inyong mga kaugalingon. Dili, sir, dili man ta angay'ng magbulagbulag, usa ra man kita. Tinuod kana.

⁴⁷ Apan samtang atua ako didto, giobserbahan ko kadto nga mga tawo. Bueno, ako, ingon nga bag-ohay pa lang nga migikan sa usa ka regular og gamay'ng Southern Baptist nga iglesia, aba, nakita ko kadto nga mga tawo, sa pagsulod ko didto ug ginapalalapak nila ang ilang mga kamot, og nanagsinggit, "Usa diha kanila, usa diha kanila, malipayon ko nga magaingon nga usa ako diha kanila!"

⁴⁸ Sa hunahuna ko, "My! Whew!" Mahibaloan mo na lang, ania na sila nga, nanagsayaw og ayo kutob sa ilang mahimo. "Tuh-tuh-tuh-tuh-tuh," nahunahuna ko, "pagkagrabe ba niini nga pamatasan sulod sa iglesia! Wala pa ako sukad-sukad nakadungog og mga ingon nianang butang." Padayon ra nako silang giobserbahan, sa palibot. Naghunahuna ko, "Bueno, unsa ba gyud kaha ang nagakahitabo niining mga tawhana?"

⁴⁹ Bueno, nadungog na man ko ninyo nga nagsugilon bahin sa kasaysayan sa akong kinabuhi, kon diin nakaadto ko niadto nga panagtigum didto. Apan mao kini ang usa ka butang nga wala nako nasulti, wala ko pa nasulti kini kaniadto, sa publiko. Ug sila. . . Karon, kung gusto ninyong tangtanganon kini diha sa inyong rekorder, aba, mahimo ra ninyong buhaton. Oo. Bueno, sa niining akong naobserbahan, ug karon nahunahuna ko, "Bueno, sila nga mga tawo mao gyud ang pinakamalipayon nga mga tawo nga akong nakita sukad-sukad sa tibuok kong kinabuhi." Wala gyud nila ginakaulaw ang ilang relihiyon. Pero kaming mga Baptist medyo nagakaulaw pa man, usahay, kabalo na mo. Kita n'yo? Ug pag mag-ampo sila, kabalo mo, magpaluyo man

gani sa bentilador, kabalo na mo. Ug—ug, apan kami. . . Apan dili ingon niana kadto nga mga tawo, igsoon, sila—aduna gyud sila’y relihiyon sa kinasuloran, sa pang-gawas, ug sa kinatibuk-an nila.

⁵⁰ Bueno, mahinumduman ko pa niadtong gabhiona sa dihang misaka ako sa entablado. Miingon man, “Ginapasaka ang tanang mga magwawali sa entablado.” Usa kadto ka konbensyon. Ngani gikinahanglan pa nilang ipahigayon kadto dinhi sa Amihanan, tungod sa—tungod sa problema kung itum ka, tungod sa Jim Crow nga balaod didto sa Habagatan. Busa nagtagbo silang tanan didto nga gikan pa sa bisan asa nga dapit. Ug, naglingkod ra ko didto. Ug miingon siya. . . Bueno, karon adunay. . . nadungog kong nagwali ang tanang mga magwawali niadtong adlaw ug niadtong gabhiona. Duna pud sila’y gitawag nga usa ka tigulang na nga magwawali, usa siya ka tigulang nga itum nga tawo nga misaka didto, og dunay diyutay na lang nga buhok sa iyang ulo, sama *niana*, nagsul-ob siya og kinaraang hataas nga pang-magwawali nga amerikana nga mora’g-dunay-ikog, kabalo na mo, nga dunay velvet nga kuwelyo, ug init pa gyud ang panahon niadto. Makaluluoy’ng tigulang na nga tawo nga misaka didto nga nakaingon *niini*. Miingon siya, “Minahal kong mga anak,” ingon siya, “gusto kong sultihan kamo,” og direktso siyang nagpamatuod. Mora’g ako gyud ang pinakabatan-on nga atua kaniadto sa entablado. Ug bueno miingon siya, “Sultihan ko kamo!” Gikuha niya ang iyang teksto diha sa Job, “Diin ka man sa pagtukod Ko sa mga patukoranan sa kalibutan? Isulti Kanako kon asa natukod ang mga niini.”

⁵¹ Ang tanan niadtong uban pa nga mga magwawali nanagwali sila mahitungod kang Cristo, maingon sa naandan na. Naminaw ko kanila, og nakaambit pud kanila. Apan dili gyud sama niadtong sa tigulang nga lalaki! Mibalik siya og mga napulo ka libo ka tuig sa wala pa misugod ang kalibutan. Dayon mipaingon siya sa Kalangitan ug mibalik sa kawanangan, sa kung unsa ang nahitabo kaniadto. Kung unsa ang giwali sa usa, gipadayon lang sa usa pa, sa tibuok adlaw; pero ang giwali sa maong tigulang maoy mahitungod sa kung unsay nahitabo kaniadto didto sa Langit. Iyang gihisgotan balik si Cristo nga anaa diha sa pinahigda nga balangaw, didto sa Eternidad. Aba, wala pa gani nakawali og mga lima ka minutos ang maong tigulang nga tawo, Aduna na’y sa kung unsa nga pagdihog kaniya. Milukso siya ug gipahagtok ang tikod sa iyang sapatos, ug misinggit, “Whoopee!” Aduna gani siya’y ingon ka dakung espasyo sama sa ako dinhi. Pero miingon pa siya, “Wala kamo’y igong espasyo para kanako aron magwali,” ug milakaw na siya.

⁵² Bueno, nahunahuna ko, “Kung nakapahimo kana sa usa ka tawo nga mga otsenta anyos na ang panuigon nga mamaingon niana, unsa pa kaha kanako? Mao kana ang akong ginatinguha. Mao gyud kana ang akong ginatinguha.”

⁵³ Apan mao kini ang nakapalibog kanako. Karon, mahitungod na sa mga demonyo ang atong ginahisgotan karon. Ang nakapalibog kanako, duna ko'y naobserbahan nga duha ka lalaki didto. Ang usa nagalingkod sa usa ka bahin, ug ang usa pud sa pikas. Ug sa diha nga mokunsad ang Espiritu, ang maong mga lalaki motindog ug mosulti og laing mga pinulongan ug mosinggit, ug mamuti ang baba. Ug sa hunahuna ko, "Oh, kanindot, kung makabaton lang unta ko niana!" Kita n'yo? "Pagkaanindot gayud! Oh, kana'y...gusto ko gayud kana!" Bueno, miadto ko sa may kamaisan. Ug gisulti ko na man kaninyo ang kasaysayan sa akong kinabuhi. Mabasa pud ninyo kini sa libro. Natulog ko didto tibuok gabii. Ug mibalik ako pagkasunod buntag, busa nakahunahuna ko nga sulayan lang nako. Aduna man gud ko'y pamaagi sa pagbuhat og mga butang nga walay si kinsa man ang nahibalo kondili ang Dios lang ug ako. Busa, mao nga, maghisgot ko og usa ka sambingay ug aron mahimamat ang espiritu sa lalaki. Ngani nakasaksi na man mo niini dinhi mismo sa entablado. Kita n'yo? Ug bueno naistorya gyud nako ang usa niadto nga mga lalaki. Nakita ko sila, tapad na sila nga naglingkod, naghinawiray sila og mga kamot ug nanagsayaw ug nanagsinggit. Sa hunahuna ko, "Oh, my, tinuod gyud kana para kanako!"

⁵⁴ Ug akong gilamano ang usa sa iyang mga kamot. Ingon ko, "Kumusta ka, sir?"

⁵⁵ Ingon siya, "Kumusta ka." Buutan kaayo nga tawo, maayo-nga-klase sa lalaki. Ingon siya. . .

Ingon ko, "Usa ka ba ka ministro?"

Ingon siya, "Dili, sir. Usa lang ako ka ordinaryo nga miyembro."

⁵⁶ Ug nagpadayon ko sa pagpakig-istorya kaniya sa makadiyut aron akong mahibal-an ang iyang espiritu. Kita n'yo? Pero wala siya nahibalo niadto. Walay si kinsa man ang nahibalo. Wala pud ko'y gikasulti mahitungod niadto. Mga tuig pa pagkahuman niadto, adisir ko kadto gisulti. Busa sila. . . Apan sa diha nga hingsayran ko na, tinuod gyud kadto, sa ingon ka eksakto gayud, usa siya ka Cristohanon nga lalaki! Kadto nga lalaki bug-os gayud nga usa ka balaan sa Dios. Nahunahuna ko, "Igsoon, maayo kana."

⁵⁷ Apan ang talagsaon nga bahin, sa dihang nalamano ko na ang usa pa ka lalaki, siya'y bali. Nakigpuyo-puyo man gud siya sa usa ka babaye nga dili niya asawa. Tinuod kana. Ug nakita ko nga may mitungha nga usa ka panan-awon, bahin kaniya. Nahunahuna ko, "Oh, my, dili gyud puede nga mamaingon-niini." Ug ang lalaki. . . nahunahuna ko, "Busa, karon, sayup gyud kining espiritu nga anaa sa taliwala niining mga tawo. Mao lang kana."

58 Busa niadtong gabhiona sa dihang ang . . . mitambong ko sa panagtigum, ug ingon nga nagaabot ang mga panalangin, nag-ampo ko sa Ginoo, ug ang Balaang Espiritu, ang Manulonda sa Ginoo nagpamatuod gyud nga ang Espiritu Santo mismo kadto. Ug ang mao ra nga Espiritu nga nagakunsad sa *niini* nga lalaki nagakunsad man pud *niadto* nga lalaki. Ug pagmokunsad ang Espiritu, pareho sila nga motindog, ug pareho pud sila nga mosinggit ug mosiyagit ug magdayeg sa Ginoo, ug mosulti og laing mga pinulongan ug managsayaw. Mao nga nakaingon ko, “Ako—ako—wala gyud ko makasabot niini, Ginoo. Ang . . . Wala man nako makita kini sa Biblia, kon diin mamahimong husto kana.” Bueno ingon pa ko, “Tingali’g nalimbongan ako.” Kita n’yo? Ingon ko . . . Karon, ania, ako—dili ko . . . ako’y—ako’y bug-os man gyud nga pundamental sa Biblia. Mao nga kini’y kinahanglan gayud nga nakabasi Niini. Kita n’yo? Ingon ko, “Ginoo, nasayod Ka sa akong kahimtang, ug ako—kinahanglan kong makita sa kini sa Imong Pulong. Ug ako—wala man gud ko makasabot. Sa diha nga nagakunsad ang Balaang Espiritu sa *niini* nga lalaki, nagakunsad man sa balaang Espiritu sa *niana* nga lalaki, ug ang usa kanila balaan ug ang usa usab hipokrito. Ug nasayod ko nga mao gayud.” Nasayod gyud ko niadto. Sa walay . . . ngani mahimo man nakong dalhon sa gawas ang maong lalaki ug pamatud-an kadto kaniya, o kaha sukmatan siya mismo didto ug sultihan siya mahitungod niadto.

59 Sama sa mahimo pud unta nako nga buhaton niadtong lalaki nga nagalingkod dinhi mismo kagabii, nga walay lain kondili usa—usa ka impostor, kon aduna ma’y impostor nga nakalingkod na dinha. Ug isulti ko na unta kadto, pero basin man gud og motindog siya ug mosugod na hinoon nga makiglalis. Mao nga ako na lang gipasagdan, tungod sa panagtigum, pero nakaila na ako kaniya. Oo, sir.

Aduna pu’y usa, duha sila, nga nagalingkod dinha mismo sa luyo, niadtong miaging gabii, nga miyembro sa usa ka iglesia dinhi mismo sa siyudad. Mga kritiko gayud! Nakita ko sila. Apan, kung isulti man gud nimo, siguradong magresulta lang hinoon og problema. Nabuhat ko na kini sa makadaghang higayon. Mao nga ginapasagdan ko na lang sila, kita n’yo. Okey lang. Nasayod man ang Dios, Siya man ang Maghuhukom. Kon hagiton man ako nila usa ka higayon, ug kung ingon-ana inyong makita nga aduna gyu’y mahitabo, makita n’yo, mao nga pasagdan na lang.

Sama sa demonyo, dili man nako ginahagit ang demonyo. Siya mismo ang nagaduol kanako ug ginahagit ako. Dinha pud nianang tungora nga mamuhat ang Dios, kita n’yo, tinuod kana, ug nakita man ninyo kung unsay nahitabo. Oo. Apan ginapasagdan ko na lang kana. Ngani nagapalisud kana sa panagtigum, tungod kay kana nga espiritu ginaataki ako mismo sa tanang panahon, kita n’yo. Pero nagapadayon lang ko.

⁶⁰ Apan karon, kadto nga mga lalaki, wala ko makasabot niadto. Ug duha ka tuig human niadto, o tulo, sa dihang atua ako sa Green's Mill, Indiana, dinhi, sa may scout reservation. Atua ako sa usa ka langub nga pirme kong ginaadtoan aron mag-ampo. Ug didto, miingon ako, "Ginoo, wala gyud ko makasabot kung unsa ba'y nahitabo niadto nga grupo sa mga tawo. Ang pinakabuutan nga mga tawo nga akong nahimamat sa tibuok kong kinabuhi, ug ako—wala ako makasabot kung unsa nga mamahimo diay kadto nga sayup nga espiritu. Sa diha nga ang...kung ingon niana nga...pero nasayod Ka man sa pagkamatinuuron sa akong kasingkasing. Nasayod pud Ka nga gihigugma gyud ta Ka ug gialagaran gyud ta Ka. Ug ang mao ra nga Espiritu nga ania, kanako, anaa man pud niadto nga mga tawo. Ug ngani atua pud Kini niadtong maong lalaki, didto, nga mao ra sa gihapon." Mao nga wala gyud nako kadto mahisabti.

⁶¹ Ug mikanaug ang Ginoo tungod sa Iyang kalooy ug may gipakita kanako. Ania kung unsa kini. Kinahanglan sumala kini sa Kasulatan, una. Miingon Siya, "Kuhaa ang imong Biblia." Ug gikuha ko ang akong Biblia. Siguro gihawiran ko kadtong Biblia sulod sa diyes minutos nga walay si kinsa man...walay unsa man nga Pulong ang miabot. Mao nga naghulat pa ako sa makadiyut. Nadungog ko Siya nga misulti pag-usab, "Ablihi ang Mga Hebreohanon 6 ug sugdi sa pagbasa." Ug mibasa ako. Ug sa dihang miabot na dinha, kon diin giingon Niini, "Ang ulan sa masubsob gayud nagakatagak ibabaw sa yuta aron bisbisan kini ug iandam kini, alang sa gitagan-an sa pag-ugmad niini...apan ang mga tunok ug mga kadyapa, nga nagkahiduol na sa pagkasinalikway, nga ang katapusan mao ang pagkasunog." Ug dinha mismo nasabtan na dayon nako.

Nahunahuna ko, "Mao diay kini. Salamat sa Dios! Mao gyud kini." Kita n'yo?

⁶² Bueno, miingon si Jesus, "Usa ka magpupugas miadto nga nagapugas og mga binhi," dili ba miingon Siya? Karon, mga Cristohanon man kamong tanan dinhi. Ang tanan nagpataas gani sa ilang mga kamot, bisan pa man, ang mga Pentecostal, mga natawo na pag-usab nga mga Cristohanon. Oo. Sila... Ug miingon Siya, "Usa ka magpupugas miadto, nga nagapugas og mga binhi. Ug sa dihang siya natulog..." Sa iyang pagpahulay, kamatayon, ang anaa sa tunga. Kita n'yo? "Ug samtang siya natulog, usa ka kaaway ang miabot ug nagpugas og mga bunglayon diha niana nga umahan." Unsa ba ang mga bunglayon? Mga sagbot, mga kadyapa ug mga ingon-anang butang. Karon, "Ug sa diha nga nakita sa mag-uuma (sa magwawali) kining mga bunglayon nga nagatubo, miingon, 'Moadto ako ug pang-ibton sila.' Ingon Siya, 'Ayaw, ayaw. Basin maibot usab ninyo ang trigo. Pasagdi ninyo nga managtubo sila pagdungan.'"

⁶³ Ngani aduna ma'y tamnanan og trigo dinhi dapit. Anaay

mga creeper, mga nettle ball, stink weed, og tanan nang uban pa diha niini. Husto ba kana? Apan, karon, aduna pu'y trigo dinha. Ngani, ang ulan sa masubsob gayud nagakatagak man sa ibabaw sa yuta, aron bisbisan kini. Karon, para sa unsa ba ang ulan? Dili para bisbisan ang nettle ball. Karon matikdi n'yo ug paminaw pag-ayo. Dili para bisbisan ang creeper. Kondili gipadala ang ulan alang gyud sa trigo, apan ang nettle ball ug ang sagbot ingon man usab ka uhaw sama sa trigo. Ug mao nga ang mao rang ulan nga nagakahulog sa trigo nagakahulog sàb sa sagbot. Ug ang gagmay'ng sagbot motubo pud mismo dinha nga ingon niana, nga malipayon ug nagakalipay, sama ra sa gagmay'ng trigo nga motubo dinha ug motindog mismo.

⁶⁴ “Apan pinaagi sa ilang mga bunga mailhan mo sila.” Mao kana. Kita n'yo? Karon, mahimo man sa mao ra nga Balaang Espiritu nga panalanginan ang usa ka hipokrito. Ang pipila kaninyo nga mga Arminian makurat gayud niana, apan mao kana ang Kamatuoran. Mao gyud kana ang Kamatuoran. Gikatudloan kamo og pagkabalaan, nagatoo man ko sa pagkabalaan, usab. Apan ang mao ra nga Espiritu, ang ulan nagakahulog sa mga matarung ug sa mga dili-matarung, apan pinaagi sa ilang mga bunga mailhan mo sila.

⁶⁵ Kung motan-aw ko dinhi ug mokuha og trigo, makakuha ako og trigo, apan ang mga sagbot nakasabud mismo niini. Ug hinoon nabuhi sila sa mao ra nga ulan nga nahulog nga alang man unta sa trigo. Ug ang ulan wala man gipadala para sa mga sagbot, kondili gipadala kini alang lang gyud sa Trigo. Apan ang ulan ingon nga anaa sa tamnanan, ang trigo ingon nga . . . ang mga sagbot ingon nga anaa man diha sa tamnanan og trigo, nakabenepisyo mismo gikan sa ulan sama sa tanang uban pa kanila nga mga trigo. Ug ang mao ra nga ulan nga nagapabuhi sa trigo, nagapabuhi pud sa sagbot.

⁶⁶ Ang tanang mga butang sa natural nagatipo man sa espirituwal, sama sa atong ginatudlo. Ingon niana, ang demonolohiya, ang mga demonyo nga nagasundog-sundog sa Cristianismo, hangtud karon, nagakadawat usab sa maong panalangin. Dili na kana gatas, mga igsoon, kung madawat ninyo kana. Kita n'yo? Kita n'yo? Karon, kini'y—kini'y Kamatuoran gayud.

⁶⁷ Busa, wala ako naluwas karon tungod kay makasinggit ako. Naluwas ako dili tungod kay nabati ko nga luwas ako. Naluwas ako tungod kay natagbo man nako ang mga kondisyon sa Dios sumala niining Biblia. Ang ingon ni Jesus, “Siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay Kinabuhing walay katapusan, ug dili na pagahukman sa silot, kondili miagi na gikan sa kamatayon ngadto sa Kinabuhi.” Nagatoo gyud ko niana. Tinuod kana. Ug basi niana nga mga kondisyon ako naluwas, tungod kay mao kana ang gisulti sa Dios.

68 Kung gisultihan niya ako nga naluwas ka tungod kay adunay tawo nga miingon, “Usa ka nagahaguros nga makusog nga hangin ang miigo sa akong nawong,” hinoon maanindot man kana, apan gusto kong mahibaloan kon diin ba naggikan kanang nagahaguros nga makusog nga hangin adisir kana miigo sa akong nawong, kita n’yo. Karon, unsa ba nga matang sa kinabuhi ang angay mong ikinabuhi human nga miigo kanimo kanang nagahaguros nga makusog nga hangin? Kita n’yo? Kita n’yo na, pinaagi man gud sa inyong bunga kamo maila. Busa, ang mga demonyo makapamuhat pud mismo taliwala sa mga Cristohanon. Nagatoo ba mo niana? Tan-awa si Pablo, ang ingon ni Pablo. . .

69 Karon dinhi kon diin ang Latter-Day Rain. . . Kung adunay si kinsa man kaninyo ang ania dinhi, pasayloa ko kung makasulti ko og unsa mang butang batok kaninyo. Hinoon wala man ko’y unsa man nga isulti batok kaninyo pareho ra usab nga wala ko’y isulti batok sa mga Assemblies, o sa kang bisan kinsa, sa mga Baptist man, o sa kang kinsa pa man. Ang Kamatuoran mao gayud ang Kamatuoran. Pero dinhi kamo, nahitapas: ginahimo niyong mga propeta kadto nga mga kalalaken-an ug mga ingon niana nga dili man unta sila mga propeta. Ang mga propeta dili man ingon nga “pandongan ra og mga kamot” ug ginapadala na. Kondili ginapanganak mismo ang mga propeta. Kita n’yo? Diha sa Biblia, aduna usab og *gasa* sa pagpropesiya. Pero dinha kamo nagakasayup, tali sa gasa sa pagpropesiya ug sa usa ka propeta. Ang gasa. . .

70 “Ang Dios, sa nagkalainlaing mga panahon ug nagkalainlaing mga paagi nagpakig-istorya sa atong mga ginikanan pinaagi sa mga propeta, og sa niing kaulahiang mga adlaw pinaagi sa Iyang Anak, nga si Cristo Jesus.” Ug ang Lawas ni Cristo adunay siyam ka espirituhanon nga mga gasa nga nagapamuhat sulod niini. Ug kini mahimong anaa sa *niini* nga babaye karong gabhiona, ang pagpropesiya, og mahimong dili na pud mahitabo sa tibuok niyang kinabuhi. Mahimong anaa na pud sa *niini* nga babaye sa sunod gabii. Mahimong anaa na pud sa *niini* nga lalaki sa sunod higayon. Mahimong anaa na sàb *nianang* usa dinha sa luyo, sa sunod higayon. Pero dili kana nagapahimo kaniya nga usa ka propeta, dili kana nagapahimo sa kang kinsa man nga usa ka propeta. Kondili gasa kini sa pagpropesiya nga anaa kanimo.

71 Ug ngani sa dili pa kana nga tawo o kana nga propesiya mahimong ipahayag ngadto iglesia, gikinahanglan ùna nga hukman kana sa atubangan sa duha o tulo ka espirituhanon nga mga maghuhukom. Husto ba kana? Karon, sumala sa, giingon ni Pablo, “Kamong tanan mamahimo man nga magpropesiya, nga sunod-sunod.” Pero kung adunay butang nga ipadayag ngadto *niining* usa, nan maghilum ùna *kanang* usa pa. Bueno, himoon niana nga mga propeta ang tibuok pundok kung ingon niana,

sumala sa maong pagtudlo sa karong panahon. Dili, iglesiang Pentecostal, ato na man gud napanglahugay ang mga butang. Ug mao kana'y hinungdan nga dili makasulod ang Dios, gawas kon maihusto sa nato ang maong butang ug ipauyon sa Biblia. Mao kana'y husto. Kinahanglan ninyong moagi sa husto nga dalan. Unsaon man ninyo sa pagtukod og usa ka balay nga dili nagatan-aw sa blueprint? Kita n'yo? Kinahanglan gyud nga magsugod kamo sa husto.

⁷² Bueno, kaniadto, ang usa ka propeta, wala kamo'y si kinsa man nga makita nga mibarug sa atubangan ni Isaias, og ni Moises. May usa diay nga mibarug, si Korah, usa niadto ka adlaw, ug misulay nga makiglantugi kaniya, ug miingon ang Dios, "Ihimulag ang imong kaugalingon, pagaablihan Ko ang yuta ug..." Ginapanganak mismo ang usa ka propeta. "Ang mga gasa ug mga pagtawag...-walay pagkabakwi." Tungod kana'y sumala man sa pagtagana-nang-daan sa Dios, gikan sa pagkabata hangtud sa pagdaku. Ang tanan-tanan ingon gayud ka eksakto sa kanunay, eksakto gayud sa kung unsay iyang gisulti nga kamatuoran nga gipanghimatud-an ug gipahayag. Mao kini ang Pulong sa Dios, nga nagaabot sa propeta. Apan ang usa ka gasa sa pagpropesiya anaa man pud sa iglesia.

⁷³ Karon moingon mo, "Bueno, ang mga propeta sa Daang Tugon ra man kana." Oh, dili! Aduna man usab og mga propeta sa Bag-ong Tugon.

⁷⁴ Ngani si Agabus usa-usa man ka propeta sa Bag-ong Tugon. Matikdi n'yo ang Espiritu sa pagpropesiya nga mikunsad kaniadto ug gisultihan si Pablo mahitungod niadto. Dayon ania si Agabus nga nagaabot nga gikan sa Jerusalem, ug nakita si Pablo, ug gibakus niya sa palibot ni Pablo ang iyang bakus, ug milingi ug miingon, "MAO KINI ANG GINAINGON SA GINOO, ang tawo nga nagasul-ob niini pagagapuson og mga kadena sa pag-abot niya ngadto sa Jerusalem." Si Agabus, nga mitindog didto ug nagsulti niana, nagsulti nang daan kung unsay mahitabo, usa mismo siya ka propeta, dili lang ingon nga usa ka tawo nga may gasa sa pagpropesiya.

⁷⁵ Ug ang gasa sa pagpang-ayo ug tanan na nianang mga gasa, higala kong Pentecostal, nalibog lang mo niana. Ang maong mga gasa anaa man sa iglesia, nga mahimong magkaaduna ang si bisan kinsa nga tawo sa iglesia, si kinsa man nga gibautismohan na pasulod ngadto sa Lawas. "Pinaagi sa usa ka Espiritu kitang tanang gibautismohan na pasulod." Ug miingon ang Biblia...

"Bueno, aduna man ako og gasa sa pagpang-ayo."

⁷⁶ Bueno, ang ingon sa Biblia, "Magsinugiray ang usa'g usa kaninyo sa inyong sala, ug mag-ampo ang usa para sa usa." Mao nga ang matag tawo mag-ampo gyud alang sa usa'g usa. Dili kita usa ka nagkabahinbahin nga pundok; usa kita ka nagkauban, nagkatigum nga pundok. Kita n'yo?

Karon, ug dinha ang mga demonyo nagapamuhat usahay.

⁷⁷ Karon matikdi n'yo kung unsa ang giingon ni Pablo, “Kung dunay usa nga mosulti og laing mga pinulongan ug ang usa pa ang magahubad, ug unsa ma'y igasulti niya, kinahanglan nga hukman una kana sa dili pa kana dawaton sa iglesia.”

⁷⁸ Karon, dili kini ingon nga pagsulti lang og Kasulatan, o mora'g ingon niana. Tungod dili man ginasumaysamay sa Dios ang Iyang Kaugalingon. Kondili kini angay nga mamahimong usa ka pasidaan para sa iglesia. Dayon kung moingon ang maayo nga mga maghuhukom, “Dawaton nato kana.” Nan maayo, iya kana sa Ginoo. Kon moingon pud ang ikaduha, “Dawaton nato kana.” “Sa baba sa duha o tulo ka saksi, pagapamatud-an ang matag pulong.” Kung ingon-niana dawaton na kana sa iglesia ug mag-andam para niana. Pero kung dili kana mamatuman, kung unsa kanang gikasulti, nan adunay dautan nga espiritu sa inyong taliwala. Tinuod kana. Ug kung matuman kana, nan salamat sa Dios, ang Espiritu sa Dios anaa sa inyong taliwala. Kita n'yo? Karon, dinha kamo kinahanglan nga magbantay ug mag-amping. Busa, ayaw n'yo paninguhaang ipugos pa. Dili man nako mahimong magkaaduna og kapihon nga mga mata kon aduna na ako'y bughaw nga mga mata, kita n'yo, kinahanglan malipay na ako sa bughaw kong mga mata. Karon, dinha kon diin nagapamuhat ang mga demonyo sa kahimtangan sa espirituhanon nga mga tawo.

⁷⁹ Karon paingon na tà dinhi sa usa ka halawom nga butang, ug nagalaum ko nga dili unta kini ingon ka halawom. Karon dinha sa Unang Samuel 28, gusto kong mobasa og pipila ka Kasulatan dinhi niining higayona mismo. Gusto ko nga maminaw sàb kamo og ayo. Ug buut kong ipahayag ang bahin sa “mga demonyo,” ipakita kaninyo kung sa unsang paagi sila nagapamuhat sulod sa iglesia mismo, ug kung unsa nga si Satanas aduna mismo'y mini sa matag tinuod nga butang. Karon inyong mahibaloan, sumala sa Biblia, nga ang mga demonyo nagasagol sa taliwala sa mga Cristohanon ug magsundog-sundog sila.

⁸⁰ Ug ngani sa makadaghang higayon ginaisip nato ang mga tawo ingon nga mga Cristohanon pagmoingon sila, “Nagatoo ako kang Jesus Cristo.” Aba, ang mga yawa nagatoo man sàb sa mao rang butang, ug mangurog pa gani. Mao nga dili kana ilhanan nga kamo naluwas. Usa sa niini nga mga gabii gusto kong hisgotan ang mahitungod sa pagpili, ug dayon makita n'yo kung unsay buut pasabot sa kaluwasan. Kita n'yo? Dili kini og unsa mang butang nga kinahanglan ninyong buhaton, sa sugod pa lang, o sa katapusan man, o wala gyud kamo'y mahimong buhaton pa bahin niini. Tungod ginaluwas man sa Dios ang tawo, nga wala gayu'y kondisyon. Grabe, mituhop kana og halawom, dili ba? Pero, karon mas maayo nga walaon sà ninyo kana sa inyong hunahuna, samtang ania pa kita niini nga hisgotanan. Okey.

⁸¹ Si Abraham ang sinugdanan sa atong pagtoo. Husto ba kana? Oh, nabaton mismo ni Abraham ang maong saad. Ug gitawag sa Dios si Abraham tungod ba kay usa siya ka halangdon nga tawo, kaha? Dili, sir. Ngani naggikan siya sa Babilonia, didto sa—sa yuta sa Caldehanon, sa siyudad sa Ur, ug gitawag siya sa Dios ug naghimo Siya og pakigsaad kaniya, nga walay kondisyon. “Pagaluwason Ko ikaw. Ug dili lang ikaw, Abraham, kondili ang imong Binhi usab,” nga walay kondisyon.

⁸² Naghimo ang Dios og pakigsaad sa tawo, pero ginalapas man sa tawo ang iyang pakigsaad sa tanang panahon; wala gyud sukad-sukad mituman ang tawo sa iyang pakigsaad sa Dios (Wala man sukad-sukad gituman ang kasugoan; tungod dili man nila arang matuman ang kasugoan; mao nga miabot si Cristo ug gibungkag ang kasugoan, Siya Mismo.) tungod kay nagtagana na man ang grasya og usa ka manluwas, si Moises, nagtagana og paagi sa paglingkawas, ug dayon sa, paglingkawas diay, ug ang mga tawo kaniadto, pagkahuman niadto, aduna gihapon sila’y gustong buhaton. Ang tawo man gud kanunay’ng gapaninguha sa pagbuhat og usa ka butang aron luwason ang iyang kaugalingon, sa dihang dili man gyud unta ninyo mahimo kana. Hinoon kinaiyahan na niya kana. Ngani sa dihadiha nga hingsayran niya kaniadto nga siya diay hubo, didto sa tanaman sa Eden, naghimo dayon siya og pipila ka dahon sa higuera ingon nga tapis. Husto ba kana? Apan naamgo niya nga dili diay kadto magpulos. Wala gyu’y mahimo ang tawo aron maluwas ang iyang kaugalingon. Mao nga ginaluwas kamo sa Dios, nga walay kondisyon, sa tanang mga nangaging kapanahonan. Ug dayon sa dihang naluwas kamo, luwas na gyud kamo.

⁸³ Matikdi si Abraham. Atua kana nga tawo, nga mipanaw didto, ug gihatag kaniya sa Dios ang yuta sa Palestina ug gisultihan siya nga dili mobiya didto. Ang si kinsa mang Judio nga mobiya sa Palestina usa siya ka nahisalaag. Mao nga gisultihan siya sa Dios nga magpabilin gyud didto. Kung gisultihan pud kamo sa Dios nga mobuhat og usa ka butang, ug wala n’yo kana buhata, nan kamo nahisalaag. Husto ba? Bueno, miabot ang hulaw kaniadto, aron sulayan ang pagtoo ni Abraham. Ug imbis nga si Abraham magpabilin ra didto, wala, wala siya nakapabilin didto, mikalagiw hinoon siya, ug gidala si Sarah ug mipanaw og halos tulo ka gatus ka milya (aduna lang unta ako’y higayon para hisgotan kana) paingon sa usa pa ka yuta.

⁸⁴ Ug sa pagkadangat niya didto, ug dayon nahimamat niya kadtong halangdon nga hari didto, si Abimelech. Usa siya ka batan-ong lalaki ug nagapangita siya og usa ka mapangasawa, ug nakita niya ang asawa ni Abraham, si Sarah, ug nahigugma siya kaniya. Ug miingon si Abraham, “Karon, sultihi ra siya nga igsoong babaye tà ka ug imo akong igsoong lalaki.”

⁸⁵ Busa nalipay si Abimelech tungod niadto, mao nga miingon

siya, “Sige, dalhon na namo si Sarah didto sa palasyo.” Ug tingali gidayandayan si Sarah sa mga kababayen-an didto, ug tungod nga minyoan na man siya sa maong hari pagkasunod adlaw.

⁸⁶ Ug si Abimelech ingon nga usa ka buutan nga lalaki, usa ka matarung nga lalaki. Ug niadtong gabhiona, samtang nahikatulog siya, nagpakita kaniya ang Ginoo ug miingon, “Mahimo ka nang isipon nga usa ka patay nga tawo.” Ingon Niya, “Ang lalaki’ng. . . Ang maong babaye nga imong gikuha didto para minyoan, asawa siya sa ubang lalaki.” Karon matikdi. “Asawa sa ubang lalaki.”

⁸⁷ Bueno, ingon si Abimelech, “Ginoo, nasayod Ka man sa pagkamatinuuron sa akong kasingkasing,” siya’y usa man ka matarung, balaanon nga lalaki. “Nasayod Ka sa pagkamatinuuron sa akong kasingkasing. Kadtong tawhana miingon man kanako nga iya kadtong ‘igsoong babaye.’ Ug dili ba miingon man usab siya kanako, siya mismo, nga ‘igsoon kong lalaki kadto?’”

⁸⁸ Ingon Niya, ingon ang Dios, “Nasayod Ko sa pagkamatinuuron sa imong kasingkasing, ug mao kana ang hinungdan nga gitipigan Ko ikaw nga dili makasala batok Kanako. Pero Ako mang propeta kadto!” Alleluyah!

⁸⁹ Naunsa man si Abraham? Nahisalaag na, ug medyo, tikasan nga bakakon na. Husto ba kana? Oh, dili, wala baya og dinagmay’ng puti nga pagpamakak. Mahimo ra kining maitum nga pagpamakak o kaha kini’y dili mismo pagpamakak. Atua mismo si Abraham nga nagasulti og klarong pagpamakak, nagaingon nga iya kono kadtong “igsoong babaye” nga unta iya man kadtong asawa, maipsuton, ug nahisalaag.

⁹⁰ Ug atua pud ang usa ka matarung nga lalaki nga nagatindog atubangan sa Dios, ug miingon, “Ginoo, nasayod Ka man sa akong kasingkasing.”

⁹¹ “Apan dili Ko pagadunggon ang imong pag-ampo, Abimelech, gawas kon kuhaon siya. . . ibalik mo ang iyang asawa ug magpa-ampo ka kaniya. Siya’y Ako mang propeta; pagadunggon Ko siya.” Oo, usa ka backslider, bakakon, apan, “Ako man kanang propeta.” Kamatuoran ba kana? Kana ang Biblia.

⁹² Karon, ayaw pud mo pagpahilayo na kaayo dinhi sa bahin sa mga Calvinista nga, “Pag anaa sa grasya, kanunay na gayu’ng anaa sa grasya,” tungod kay basin mosangpot kamo sa kaulawan. Kita n’yo? Bueno, kadali lang, mogahin ra kita og oras niining semanaha aron hisgotan kana ug ipakita kaninyo kung unsa ka balanse kana. Pero ayaw n’yo hunahuna nga tungod kay nakabuhat kamo og usa ka butang nga sayup malaglag na kamo hangtud sa kahangturan. Anak kamo sa Dios, natawo kamo sa Espiritu sa Dios, kamo gayu’y mga anak nga lalaki ug mga anak

nga babaye sa Dios, ug pagapamatud-an man sa mga bunga ang kaugalingon niini. Mao kana.

⁹³ Karon, ania kita, nahimutang sa yuta. Karon, gusto kong mobasa dinhi, sa ika-6 nga bersekulo.

Ug sa diha nga nangutana si Saul sa GINOO, ang GINOO wala tumubag kaniya, ni pinaagi sa damgo, ni pinaagi sa Urim, ni pinaagi sa usa ka propeta.

Ug unya miingon si Saul sa iyang sulogoon, Pangitai ako og usa ka babaye nga espiritista, aron ako moadto kaniya, ug mangutana kaniya.

Naa lang gyud ko’y butang nga ipatataw dinhi mismo, kanang sa . . . “Pangitai ako og usa ka babaye nga espiritista.”

. . . Ug ang iyang sulogoon miingon ngadto kaniya, Ania karon, adunay usa ka babaye nga espiritista didto sa En-dor.

Ug si Saul nagtakuban sa iyang kaugalingon, ug nagsul-ob og saput, laing saput, ug miadto siya, duha . . . ug duruha ka lalaki uban kaniya, ug nangadto sila sa babaye sa gabii: ug sila miingon, nangaliyupo ako kanimo, . . . -magna ka kanako pinaagi sa imong pagka-espiritista, ug patunghaa . . . kanako, bisan kinsa sumala sa akong hinganlan kanimo.

Ug ang babaye miingon kaniya, Ania karon, ikaw nahibalo niadtong gibuhat ni Saul, nahibalo, nga giwagtang kadtong tanang mga espiritista, ug . . . mga salamanghero, gikan sa yuta: busa . . . nagbutang ka og usa ka lit-ag alang sa akong kinabuhi, ug sa pagpatay kanako?

Ug si Saul mitubag, nanumpa kaniya tungod sa GINOO, nga nagaingon, Ingon nga ang GINOO buhi, walay mamahimong silot nga mahanabo nganha kanimo . . .

Unya miingon ang babaye, Kinsay akong patunghaon . . . kanimo? Ug siya miingon, Patunghaa kanako si Samuel.

Ug sa pagkakita sa babaye kang Samuel, siya misinggat sa usa ka makusog nga tingog: ug ang babaye misulti kang Saul, nga nagaingon, Nganong naglimbong ka kanako? kay ikaw mao si Saul.

Ug ang hari miingon kaniya, Ayaw kahadlok: kay unsay nakita mo? Ug ang babaye miingon ako . . . ngadto kang Saul, ako nakakita og mga dios nga nagagula gikan sa yuta.

Ug ang hari miingon kaniya, Unsang dagwaya siya? Ug siya miingon, Usa ka tigulang nga tawo nagagula; ug siya giputos sa usa ka kupo. Ug si Sam- . . . (Kadto

ang kupo nga iya sa maong propeta, siyempre. Kita n'yo?) . . . *nakaila nga kadto mao si Samuel, ug siya mitindog nga . . . ug giyukbo ang iyang nawong ngadto sa yuta, ug mihatag og katahuran.*

Ug si Samuel miingon ngadto kang Saul, Ngano nga ikaw nagsamok kanako, ug gipagula ako? Ug si Saul mitubag, ug miingon, ako nagakaguol sa hilabihan gayud; tungod kay ang mga Filistehanon nakiggubat batok kanako, ug ang Dios mibulag gikan kanako, ug wala na nagatubag kanako, ni pinaagi sa propeta, ni pinaagi sa damgo: busa ako. . . misangpit nganha kanimo, aron nga ipahibalo mo kanako kung unsay angay kong pagabuhaton.

Ug si Samuel miingon, Ngano man . . . nga mangutana ka . . . kanako, sa nakita mo nga ang GINOO mibulag gikan kanimo, ug—ug nahimo nga imong kaaway?

Ug ang GINOO mao'y nagbuhat ngadto kaniya, sumala sa iyang gipamulong nganhi kanako: ug ang GINOO mao'y nagpikas sa iyang gingharian gikan sa imong kamot, ug nga gihatag kini bisan ngadto . . . kang David:

⁹⁴ Karon, daghan man kaninyo, ang nasayod na niini. Busa buut nato nga modiritso na mismo, ug tabangan unta kita sa Dios karon, sa pipila ka gutlo, sa paghisgot niini. Karon matikdi. Dunay usa ka lalaki, si Saul, nga kaniadto giisip nga usa ka propeta, tungod kay nagpropesiya man siya uban sa mga propeta. Husto ba kana, mga magtutudlo? Bueno, ania ang maong lalaki nga nag-backslide na. Husto ba? Apan hinumdumi diin giingon na ni Samuel nga ang maong lalaki mahiuban na, kaniya, pagkasunod adlaw niadto. Tungod nga namatay man siya og sayo, kita n'yo. Oo, kung dili gani mo motuman sa Dios, nan pagakuhaon na lang mo sa Dios gikan sa yuta.

⁹⁵ Tan-awa n'yo ang sulat para sa Taga-Corinto kaniadto, kung giunsa ni Pablo paghan-ay kadto nga mga tawo. Ang ingon niya, “Una, nagapasalamat ako sa Dios tungod kaninyo, nga walay mga ingon nianang butang sa taliwala ninyo, ug uban pa, ug kung unsa nga—nga wala kamo hikabsi sa bisan unsang gasa nga espirituhanon.” Gisultihan sila kaniadto kung unsa sila, sumala sa ilang hustong pagkapuwesto, diha kang Cristo. Dayon hinay-hinay na niya silang gimakmak, gisultihan sila mahitungod sa ilang mga babayeng magwawali, ug kung unsa na ang ilang ginapangbuhat, ug kung sa unsang paagi sila nagakaon diha sa lamesa sa Ginoo.

Ug aduna pa gani sila og usa ka lalaki nga nakigpuyo-puyo sa asawa sa iyang amahan, ug giingnan niya kadtong tawo nga diha kang Cristo, “Itugyan siya ngadto sa yawa, para sa pagkalaglag sa unod, aron ang kalag mamaluwas.” Kita n'yo, mao kadto, gitugyan na lang siya. Miingon ang Biblia, “Tungod

niini nga hinungdan daghan kaninyo ang mga mahuyang ug mga masakiton, ug ang uban nangamatay,” nangamatay og sayo tungod sa sala. Mao nga kon kuhaon ka man sa Dios; usa kana ka maayo nga ilhanan nga usa gyud ikaw ka Cristohanon, kung kuhaon ka man gani.

⁹⁶ Ug, karon matikdi n’yo dinhi, si Saul kaniadto giisip nga usa sa mga propeta, o usa sa taliwala sa mga propeta, tungod kay nagpropesiya man pud siya. Pero nag-backslide siya, tungod kay gisupak man niya ang Dios, ug ang iyang gingharian gikuha gikan sa iyang mga kamot ug gipahimutang ngadto sa kamot ni David, nga gidihogan sa Dios pinaagi ni Samuel, gamit ang dala niyang tibod sa lana.

⁹⁷ Matikdi, kaniadto, may tulo ka pamaagi nga aduna sila para sa paghibalo sa mga butang gikan sa Dios; ang una mao—mao ang propeta, ang ikaduha mao’y sa usa ka damgo, ug ang ikatulo mao ang Urim Thummim. Ug mahimo pud nga walay ni usa niana ang motubag. Karon, kabalo man mo kung unsa ang propeta, kabalo mo kung unsa ang usa ka espirituhanon nga damgo, ug kabalo pud mo kung unsa ang Urim Thummim. Abi ninyo, niadtong miaging adlaw gipangutana ko ang usa—usa ka tawo kung unsa ba ang Urim, ug ang maong tawo dili makatubag kanako kung unsa ba, ang Urim Thummim. Siyempre, ang Dios man kadto nga nagatubag pinaagi niana. Kita n’yo?

⁹⁸ Ug ang yawa nagahimo pud og pagsundog-sundog sa kada usa niana; nga mao ang salamangkero, ang mini nga propeta, ug ang nagatan-aw sa nagasidlak nga bola nga bildo. Kita n’yo?

Kaniadto, ang Urim Thummim nakasab-it sa may dughan ni Aaron, *dinhi*, ug ang maong Urim Thummim natabonan og mga bato. Ug ila kadtong ginasab-it sa templo. Ug pag dili sila sigurado, moadto sila sa atubangan sa Dios, para sa maong tubag, ug ang kahayag mosidlak niadtong Urim Thummim, kon, kadto ba’y kabubut-on sa Dios, o dili. Karon, pag dili motubag ang Urim Thummim. . . Bueno, mao kadto ang direkta nga tubag gikan sa Dios.

Karon, ang Urim Thummim sa karong panahon; ang manghihimalad mokuha pud og usa ka bola nga bildo, aron sundogon Kana; usa gyud ka mini nga butang. Ang Dios anaa diha sa trinidad; ang mga gahum sa Dios anaa diha sa trinidad. Ug ang yawa usab anaa diha sa trinidad, ug ang iyang mga gahum anaa pud diha sa trinidad. Ug mapamatud-an ko kana pinaagi sa Biblia. Ug kanang Urim Thummim, ang. . . ang bola nga bildo ang mao ra’y ginagamit sa yawa sa karong panahon. Ug ang mini nga propeta sa karong panahon, ang usa nga aduna kita sa karon, mao ang, o, ang balbal, o ang manghihimalad didto, nga nag-angkon-angkon sa puwesto sa propeta, nga iya sa yawa. Nasabtan n’yo ba ang buut kong ipasabot?

⁹⁹ Dayon, karon, ang Urim Thummim sa karong panahon mao kining Biblia. Mao nga kung aduna ma'y nagpropesiya o may usa ka damgo, ug kon dili kana nagatukma o nagakatakdo sa Biblia sa Dios, nan mini kana. Ayaw n'yo toohi kana.

¹⁰⁰ Usa ka lalaki ang miduol kanako dili pa lang dugay, nga taga-India, kon diin hapit na akong moadto, usa ka maayo nga magwawali. Ingon siya, "Igsoong Branham, mianhi ko dinhi." Miingon, "May usa ka babaye man gud nga naangkon na ang Espiritu Santo, ug," miingon, "siya'y usa ka makahimuut, buutan kaayo nga babaye." Ingon pa siya, "Ug siya'y naminyo na sa makaupt ka higayon, ug nakigpuyo karon sa ikaupat niyang bana. Ug ingon ko, 'Bueno, giunsa man pagkahitabo niana, Ginoo?'" Ug miingon, "Mao nga miduol ako sa Dios ug miingon, 'Oh, himaya sa Dios!' Miingon, 'Alleluyah! Dalaygon ang Ginoo!'" Usa mismo siya sa mga ingon-niana nga matang, kabalo na mo. "Miingon, 'Alleluyah! Dalaygon ang Ginoo!'" Ingon pa, "Miingon kanako ang Ginoo, 'Ania, padamgohon Ko ikaw og usa ka damgo.'" Ug miingon, "Tuod man nagdamgo gyud ako nga ang akong asawa kono, nakita ko siya nga nagakinabuhi diha sa pagpanapaw. Pero mibalik man siya kanako ug miingon, 'Oh, mapasaylo pa ba ko nimo, Victor? Mapasaylo pa ba ko nimo? Wala ako...' 'Aba,' ingon ko, 'oo, pasayloon ta ka ug dawaton ta ka pag-usab.'" Miingon siya, "Karon, mao kana ang akong gibuhat." Miingon, "Kita mo, nagpasaylo ako."

¹⁰¹ Ingon ko, "Victor, maanindot gayud ang imong damgo, apan ang yawa man ang nagpadamgo niana kanimo."

Ingon siya, "Ngano man?"

¹⁰² Ingon ko, "Wala man kana mitukma sa Pulong sa Dios. Tungod nga nagakinabuhi man ang imong asawa diha sa pagpanapaw. Mao gyud. Dili siya puede nga makigpuyo sa upat ka lalaki. Tinuod. Pero kon biyaan niya kana ug mobalik sa iyang unang bana, nan mas mosamot pa hinoon siya kaysa kung unsa siya sa pagsugod. Tungod kinahanglan na man niyang magkinabuhi nga mag-inusara, sa tibuok niyang kinabuhi." Ingon ko, "Nasayod ka nga wala kana nagatukma sa Pulong sa Dios. Busa ang iyang... Ang imong damgo sayup gayud." Ingon ko, "Tungod wala kana nagatukma Niini."

¹⁰³ Ug kaniadto pag ang usa ka propeta nagpropesiya, ug nagsulti sila, ug kung gusto nilang mahibal-an kung tinuod ba ang maong propesiya, nan ila kanang ipaatubang sa Urim Thummim. Ug kung ang Tingog sa Dios mohatag og kahayag diha sa Urim Thummim, kung ingon-ana bug-os gayud kana, nga Kamatuoran. Ug kung may usa ka tawo magahatag og paghubad, magadamgo og usa ka damgo, magapahayag og usa ka butang gikan sa Biblia, o, kaha unsa mang butang, ug kon dili kana nagatukma sa Biblia sa Dios, nan mini kana. Mao kini ang

Urim Thummim sa karong panahon. Pag nagasulti ang Pulong sa Dios, ug mao na kana ang direkta nga Tingog sa Dios, sama sa Urim Thummim kaniadto sa wala pa nahisulat ang Biblia. Amen! Alleluyah! Medyo mibati ako og pagkarelihiyoso karon mismo. Ayaw n'yo hunahunaa nga usa ako ka panatiko, kung ingon-ana man ang hunahuna n'yo. Nasayod ako, nasayod ako mismo kon asa ako. Dili pud ko emosyonal. Husto kana.

¹⁰⁴ Ania ang Kamatuoran, ang Pulong sa Dios! Dili ko igsapayan kung unsa man nga matang sa damgo ang inyong gidamgo, o kung unsa nga matang sa propesiya ang inyong gipropesiya, kung dili kana uyon sa Pulong sa Dios, nan sayup kana, kung dili kana nagatukma niining Pulong. Mao kana ang problema karong panahona. Ang usa adunay damgo, ang usa adunay panan-awon, ang usa adunay pagsulti'g laing pinulongan, ang usa adunay kapadayagan; gilamukat gyud niini ang tibuok butang ug tanan na, aduna na kamo'y mga denominasyon ug mao nga nagkabahinbahin na ang tanan. Kinahanglan ninyong ibalik kana sa usa ka pinaka-basihanan, ug mao kana ang Pulong sa Dios. Tinuod kana.

¹⁰⁵ Ngani may mga iglesia nga nangatukod basi sa usa nga, miingon, "Oh, moabot si Jesus nga nakasakay sa usa ka puti nga kabayo. Nasayod ako. Nakita ko Siya diha sa usa ka panan-awon." Naghimo sila og ingon-ana nga matang sa iglesia. "Oh, alleluyah! Moabot Siya diha sa usa ka panganod." Naghimo pud sila og ingon-ana nga matang. Mao nga nagkabahinbahin na sila, ug nagkabulagbulag, ug ginatawag ang usa'g usa "salag sa buitire," ug "tigumanan sa kuto," ug tanan nang ingon-niana. Aba, igsoon, nagapakita lang kana, sa sugod pa lang, nga ang inyong kasingkasing dili pa husto diha sa Dios pag ginabuhat n'yo kana. Tinuod. Managsoon man kita. Kinahanglan mag-inunongay kita sa usa'g usa. Gikinahanglan nato ang usa'g usa.

¹⁰⁶ Karon tan-awa. Nahisalaag si Saul kaniadto, ug miadto siya didto. Siya, ang Dios, Iya na mang gitalikdan ang maong hari. Ug miadto siya didto ug nangutana sa mga propeta. Miadto ang mga propeta ug misulay sa pagpropesiya, pero miundang man ang Dios, og dili na mohatag og panan-awon. Migawas ang propeta, miingon, "Dili ko mahimo. Dili. Wala gyud Siya'y unsa man nga gisulti kanako mahitungod kanimu."

¹⁰⁷ Bueno, dayon miingon si Saul, "Ginoo, hatagi ako og damgo." Matag gabii, wala gihapo'y damgo nga miabot.

¹⁰⁸ Dayon miadto na sàb siya sa Urim Thummim, ug ingon siya, "Oh Dios! Misulay na ako sa mga propeta, misulay na ako sa mga damgo, karon tabangan Mo unta ako. Mahimo Mo ba?" Pero wala gihapon kadto gipasiga, wala gayu'y Kahayag nga misidlak.

¹⁰⁹ Busa miadto na lang siya sa usa ka balbal, nga talamayon, og dautan. Ug miadto siya kaniya, ug nag-ukoy-ukoy siya didto

ug nagtakuban sa iyang kaugalingon. Ug migawas kining balbal ug gitawag ang espiritu ni Samuel.

¹¹⁰ Karon, kabalo ko kung unsa ang ginahunahuna ninyo. Dagha'y miingon nga, "Dili kadto si Samuel." Apan miingon man ang Biblia nga si Samuel kadto, ug si Samuel man gyud. Pagkatalagsaon kung unsaon n'yo nga masabtan kana, dili ba? Apan si Samuel gyud kadto. Miingon ang Biblia nga siya mismo kadto.

¹¹¹ Ug mahimo man niadtong balbal nga tawgon siya, ug gitawag niya si Samuel. Ug si Samuel bisan nga atua na sa lahi nga dapit, pero nahibalo gihapon siya sa kung unsa ang nagakahitabo, ug atua nagatindog nga sul-ob gihapon ang iya mismong pang-propeta nga kupo. Busa, igsoon, pag namatay ka na, dili man ingon nga patay ka na gyud, kondili nagapuyo ka lang sa kon asa man, sa lahi na nga dapit.

¹¹² Mohunong sà ko sa makadiyut, aron ipatuhop pa og diyutay ang mahitungod niining demonolohiya. Ang maong balbal usa ka demonyo, apan aduna man siya'y haduol nga pagpakigkontak sa espirituwal nga kalibutan. Ngani, karong panahona, daghang mga espiritista ang mas nakahibalo gayud mahitungod sa espirituhanong kalibutan kaysa mga tawo nga nagapahamayag mismo nga mga Cristohanon, gani usa siya ka demonyo. Sa mga panahon sa Biblia mao ra gihapon.

¹¹³ Kaniadtong ania pa si Jesus sa yuta, atua na kadtong mga propesor ug mga eskolar ug mga magtutudlo, ang pipila sa mga pinakahinashasan kaniadto, gikan sa mas maayo nga mga seminaryo kaysa mahimo natong tukoron sa karong panahon. Ug balaan, inila nga mga tawo, kinahanglan ingon niana sila. Kung sutaon kaniadto ang usa ka Levihanon, kinahanglan man siyang masuta nga walay-ikasaway kaniya, matarung gayud sa tanang paagi. Ug bisan pa niana ang maong tawo wala ma'y nahibaloan mahitungod sa Dios maingon sa usa ka rabbit nga walay nahibaloan mahitungod sa sapatos nga pang-niyebe. Ngani sa dihang miabot si Jesus, napakyas siya sa pag-ila Kaniya, ug gitawag pa niya si Jesus nga usa ka "yawa." Ingon niya, "Siya'y Beelzebub, ang principe sa yawa." Husto ba?

¹¹⁴ Ug atua usab didto ang pinakaubos nga matang sa usa ka demonyo, nga gigapus ang usa ka lalaki didto sa mga lubnganan, ug tanan na, ug nanagsinggit sila. Miingon ang yawa mismo, "Nasayod kami kon si Kinsa Ikaw. Ikaw mao ang Anak sa Dios, ang Maong Balaan." Husto ba kana? Ang mga balbal ug mga salamangkero, og mga yawa, naila Siya ingon nga Anak sa Dios; pero ang edukadong, mga magwawali nga gikan sa pang-teologong seminaryo naila Siya ingon nga Beelzebub. Kinsa man ang husto, ang yawa ba o ang magwawali? Ang yawa. Ug, igsoon, wala gayud kana nausab karong panahona. Wala gyud gihapon nila maila ang gahum sa Dios.

115 Bisan unsa pa kadaghan ang inyong pagpanudlo, mahimo pa ninyong balik-balikon kana pagtuon. Pero ang Dios wala man diha sa hataas nga mga pagpanulti. Anaa ang Dios sulod sa usa ka matinud-anon nga kasingkasing. Mahimo mo mang motindog dinhi, mamulong og halawom nga mga pagpanulti, nga daw sa wala na ko kahibalo kung unsa, pero dili kana magpahiduol pa kanimo ngadto sa Dios. Mahimo nimong motindog ug mag-praktis kung unsaon pagsulti ang imong wali ug isulti kining mga butanga, dili pud kana magpahiduol pa kanimo ngadto sa Dios. Mahimo nimong tun-an og ayo ang diksyunaryo hangtud nga ginadulog na nimo kana, ug sa gihapon dili kana mao'y magpahiduol pa kanimo ngadto sa Dios. Kondili ang usa ka mapainubsanon, nahitugyan nga kasingkasing, diha sa kayano, mao gayud ang magpahiduol kaninyo ngadto sa Dios. Ug tinuod kana. Amen! Usa ka mapainubsanon nga kasingkasing, ang ginahigugma gyud sa Dios. Karon, bisan pa kung wala ka mahibalo sa imong ABC, wala kana'y diperensya. Basta mapainubsanon lang gayud ang kasingkasing mo! Tungod nagapuyo man ang Dios sulod sa usa ka mapainubsanon nga kasingkasing; dili sa edukasyon, dili sa mga tulonghaan, dili sa teolohiya, og mga seminaryo, dili sa tanan na niining nagkalainlaing mga lugar; dili sa halangdon nga mga pagpanulti, ni dili pud sa klasikal nga mga lugar. Kondili nagapuyo mismo ang Dios sulod sa kasingkasing sa tawo. Ug kon mas mapaubos pa ninyo ang inyong kaugalingon, og magmahimong mas yano, nan mamahimo kamong mas halangdon diha sa atubangan sa Dios.

116 Sultihan ko kamo og usa ka butang. Nakita nako ang inyong mga tamnanan dinhi nga puno og trigo. Ang bus-ok nga trigo pirmi kanang nagayukbo. Samtang ang gamay'ng udlot gatuskig ra kana, ug nagapalingpaling nga mora ba og nasayod na sa tanan, pero wala pa kana'y sulod. Ingon niana usab ang kadaghanan sa niining mga tawo nga gahunahuna nga daghan na sila og kahibalo sulod sa ilang ulo, pero wala diay og bisan unsa sulod sa ilang kasingkasing, bisan pa man. Pero ang usa ka balaan nga ulo nagayukbo gayud ngadto sa Gahum, nga ginaila si Jesus Cristo ingon nga Anak sa Dios, ug nagatoo sàb sa Iyang mga buhat.

117 “Ug Siya mao sa gihapon, kagahapon.” Oh, naila man nila Siya, sigurado, basi lagi sa makasaysayan nga panglantaw. Apan dili baya kini usa ka makasaysayan nga butang. Dunay mga tawong motindog ug moingon, “Oh, nagatoo ako sa Pentecostes, sa dihang nadawat nila kaniadto ang dakung pagbubo ug mga ingon nianang butang,” ug magdrowing og kalayo. Ang usa ka tawong nagakurog tungod sa katugnaw dili man mahimong mainitan pinaagi sa usa ka gidrowing lang nga kalayo. Ang gidrowing lang nga kalayo dili man nagapainit. Ingon niana sila kaniadto. Unsa kaha sa karon, kung Siya mao sa gihapon

kagahapon, karon ug hangtud sa kahangturan? Ingon nga gidrowing lang nga kalayo. Kon may usa ka tawo nga halos mamatay na sa katugnaw, og sultihan, “Tan-awa lang kanang dakung kalayo nga aduna sila kaniadto.” Aba, dili ka gayud mainitan niana.

¹¹⁸ Kung unsa man ang gibuhat nila kaniadto sa Pentecostes, kung unsa man ang nabatonan nila sa unang Tugon, nabatonan sàb nato karon! Ug sa dihadiha nga nahapsay na sa Dios ang maong butang, ug ang Iglesia natipon na, moabot na ang Pagsakgaw. Apan dili man gani nato mahimo nga magkaaduna og pagtoo alang sa Balaanong pagpang-ayo, unsa pa kaha sa Pagsakgaw, tungod man gud kay nangatuis na kita, may usa nga sa *ingon-ini* nga direksyon ug may usa pud nga sa *ingon-ana* nga direksyon. “Si Doktor *Ingon niini-ug-ingon niana* miingon man nga kono *ingon-niini* Kini. Bueno, ang akong magwawali miingon man nga Siya’y *Ingon-niini*.”

¹¹⁹ Kaganina, may usa ka babayeng miingon, “Siya’y usa lamang ka maglilimbong.” Ingon pa, “Mao kana ang gisulti kanako sa akong pari.” Motambong lang unta dinhi kausa ang iyang pari, og tan-awon nato kung kinsa kaha ang maglilimbong. Oo. Atong tan-awon kung kinsa ba ang maglilimbong. Umanhi kamo og sulayi kini.

¹²⁰ Ngani dili pa lang dugay didto, sa Harlingen, Texas, nagpahigayon kami og panerbisyo didto. Ug aduna sila’y dagkung mga karatula, sa tanan nilang mga sakyanan niadtong gabhiona sa pag-adto ko didto, ang ingon nga atua kono didto ang FBI aron ibutyag ako ingon nga usa ka maglilimbong. Ug duna ma’y usa ka dalaga nga naayo didto sa usa ka lugar sa Texas. Siya’y taga, ug, ako—sa hunahuna ko, mga usa ka libo ka milya, didto na dapit sa Panhandle. Ug didto kini sa Harlingen, didto na sa may utlanan. Miduol si Igsoong Baxter, og miingon, “Igsoong Branham,” miingon, “wala pa gyud nimo nakita ang kagubot didto, nga duna na’y mga upat o lima ka libo ka tawo.” Ug miingon, “Ug dayon, sa palibot didto, adunay mga FBI aron dakpon kono ka diha sa entablado karong gabhiona, ug ibutyag ka.”

Ingon ko, “Bueno, malipay gayud ko niana.”

¹²¹ Miingon, “Kabalo ba ka niadtong dalaga nga naayo niadtong miaging gabii?”

¹²² Paadto na ako niadto gikan sa . . . paingon sa akong lawak. Aduna ko’y nadungog nga gahilak, ug mitan-aw ko sa palibot. Nahunahuna ko nga aduna siguro’y gisulong. Pero usa man diay kadto ka dalaga. Ug milingi ako. Ingon ko. . . Ug mibalik ako, ingon ko, “Unsa ma’y problema, Madam?” Ug duha kadto ka dalaga nga nagatindog didto, mga dise-siete, dise-otso anyos ang panuigon, ang matag usa kanila, nga ginagakus ang usa’g usa, nga gahilak.

123 Miingon, “Igsoong Branham!” Kabalo na dayon ko nga nakaila sila kanako. Miingon, “Kami, gidala ko gayud siya dinhi.” Miingon, “Kinahanglan na man gud siyang dalhon ngadto sa institusyon sa mga buang.” Ug ang maong dalaga nakatambong diay sa akong panagtigum didto sa Lubbock, Texas. Ug ingon pa, “Nasayod ko nga kung madala ko lang gyud siya dinhi ug maiampo mo siya, nagatoo ko nga ayohon gyud siya sa Dios.”

124 Bueno, nahunahuna ko, “Pagkadaku nga pagtoo!” Ug miingon ko, “Bueno, karon, igsoon, mahimo mo bang dalhon siya . . .” Ug niadtong tungora mismo miingon ko, “Mianhi kamo dinhi nga nagasakay sa usa ka dalag nga sakyanan, dili ba?”

Miingon, “Oo!”

Ug ingon ko, “Ang imong inahan usa na ka baldado.”

Ingon siya, “Tinuod kana.”

Ingon ko, “Miyembro ka sa iglesiang Methodist.”

Ingon siya, “Tinuod gayud kana.”

125 Ug miingon ko, “Sa pagbiyahe n’yo paingon dinhi, hapit kamong nabalintong. Nangatawa kamo niining dalaga sa pagagi ninyo sa dalan diin katunga semento ug katunga aspalto, ug paliko na mo niadto.”

Ingon siya, “Igsoong Branham, tinuod kana!”

Ingon ko, “Ug, MAO KINI ANG GINAINGON SA GINOO, naayo na kining dalaga.”

126 Pagkasunod adlaw gipadilaab niya ang maong lungsod, gisultihan ang tanang tawo, sa bisan asa mahitungod niadto. Siyempre, wala man sila nakaila kaniya didto, kon siya ba’y anaa gyud sa ingon niadto nga kahimtang o wala. Ug dayon niadtong adlaw ako . . . Miingon si Igsoong Baxter, “Igsoong Branham,” miingon, “atua didto kadtong mga dalaga nagimpake na sa ilang maleta.” Ug mao kini ang usa ka butang nga wala niya mahibaloi nga nakahibalo diay ko. Pahurot na kaniadto ang among pinansiyal nga pondo. Dili man gud nako siya mapahanugotan nga maghisgot bahin niana. Apan ang usa sa niadtong mga dalaga nagbutang diay og siyam ka gatus nga dolyares sa—sa offering usa ka gabii sa wala pa kadto, ug nga mao’y nahimong sulbad sa among gikinahanglan nga kuwarta kaniadto. Karon, wala siya, wala pa siya kahibalo niini hangtud niining adlaw, pero nakahibalo na ako niini. Kita n’yo? Hinoon ako . . . gisultihan man ko sa Dios nga masulbad ra gyud kadto.

127 Ug miingon si Igsoong Baxter, “Igsoong Branham,” miingon, “mas maayo kon imo na akong tugotan nga mohimo og diyutay’ng paghangyo.” Ingon pa, “Aduna man gani sila og pipila niining mga Balaanong mananambal dinhi nga nagapangayo sa niining mga tawo.”

128 Ingon ko, “Ayaw gyud bisan unsa man. Dili, sir. Ayaw kana buhata. Igsoong Baxter, pag mohangyo na gani ka og kuwarta nga sama niana, nan panahon na kana nga maglamanohay kita sa usa’g usa ingon nga managsoon, og magasangyaw ako nga mag-inusara na lang.” Kita n’yo? Ingon ko, “Ayaw kana buhata.” Ingon ko, “Ang Dios man ang nanag-iyá sa mga kabakahan nga anaa sa usa ka libo nga mga bungtod, ug ang tanan-tanan panag-iyá gayud Niya. Panag-iyá man Niya ako. Atimanon gyud Niya ako.”

Ingon siya, “Sige.”

129 Ug niadtong gabhiona mismo ingon siya, “Igsoong Branham, tan-awa dinhi. Adunay tawo. . . Tan-awa dinhi! Aniyá usa ka sobre dinhi, nga walay ngalan, og adunay siyam ka gatus dolyares nga kuwarta sa sulod niini. Eksakto ra gayud sa atong gikinahanglan nga makolekta.”

Ingon ko, “Igsoong Baxter.”

Ingon siya, “Pasayloa ko.”

130 Busa niadtong tungora kabalo ko nga ang maong dalaga kadto. Ug dayon—dayon pagkasunod adlaw, miingon si Igsoong Baxter, “Igsoong Branham, atua sila didto nag-impake na sa ilang mga sinina, og nagahilak.”

Ingon ko, “Unsa ma’y problema?”

Miingon, “Mas maayo pa nga adtoan mo sila.”

131 Miadto ako sa lawak nga ilang nahimutangan. Ingon ko, “Asa man nga lawak sila nahimutang?” Miadto ko didto ug mituktok sa pultahan. Nadungog ko sila nga nagahilak. Nanuktok ko sa pultahan, ug miduol ang dalaga sa pultahan, ingon siya, “Oh, Igsoong Branham, pasayloa gyud ko.” Ingon siya, “Ako ang naghinungdan niining tanan nga problema kanimo.”

Ingon ko, “Problema? Unsa diay nahitabo, igsoon?”

Ingon siya, “Oh, ako man gud ang hinungdan nga ginapangita ka sa FBI.”

Ug miingon ko, “Oh, mao ba?”

132 Miingon, “Oo.” Miingon, “Siguro nasobrahan ko ang pagpamatuod sa siyudad karong adlaw, ug tanan na.”

Ingon ko, “Dili.”

133 Ug ingon siya, “Igsoong Branham, atua na didto ang FBI, atua na didto, aron ibutyag kono ka unyang gabii.”

134 Ingon ko, “Bueno, kung ako—kung nagabuhat ko og unsa man nga dili-maayo, nan kinahanglan gyud kong mabutyag.” Kita n’yo? Ingon ko, “Sige. Kung ang pagwali sa Ebanghelyo gikinahanglan man nga mabutyag, bueno, buhaton nato kana.” Kita n’yo? Ingon ko, “Ako—ako—hinoon nagakinabuhi ako nga sumala niining Biblia, ug ang wala ginasulti niining Biblia. . .

Kini mao ang akong panalipod, kini mismo.” Kita n’yo? Ug ingon ko, ug siya . . .

Ingon siya, “Bueno,” miingon, “Gikasubo ko lang gyud nga nga nabuhat ko ang akong nabuhat.”

Ingon ko, “Wala man ka’y nabuhat nga unsa man, igsoon.”

Ingon siya, “Bueno, wala ba ka nahadlok nga moadto didto?”

Ug ingon ko, “Wala.”

Ingon siya, “Bueno, atua baya ang FBI.”

¹³⁵ Ingon ko, “Bueno, nakatambong na man sila sa akong panagtigum kaniadto ug naluwas sila.” Ingon ko, “Si Mr. Al Farrar . . .”

¹³⁶ Si Kapitan Al Farrar, ngani daghan kaninyo ang nakahibalo na mahitungod sa iyang pagkakabig didto sa Tacoma, Washington, og naluwas, didto mismo sa usa ka bansayanan sa pagpamusil. Mitambong siya sa panagtigum, ingon siya, “Duha ka tuig kong gibantayan kining tawhana. Ug nadungog ko na ang mahitungod sa iyang mga pinansyal, ug gisusi mismo kadto, ug gisusi ko na ang tanan.” Ug miingon, “Mao kini ang Kamatuoran, wala kamo nagapaminaw sa usa ka panatiko karong gabhiona, kondili nagapaminaw gyud kamo sa Kamatuoran.” Ingon pa, “Dunay usa sa mga kalalakenan sa puwersa sa kapulisan, nga ang iyang anak ako nang napaeksamin sa doktor ug gipaadto siya ngadto sa linya sa pagpaampo,” ug miingon, “ang maong bata gikasultihan eksakto kung unsa gyu’y problema niini, ug kung unsay nahitabo niini. Ug giingnan pa, “Sa walo ka adlaw makaeskwela na kini’g balik,” usa ka kaso sa polio. Ug miingon, “Sa ikawalo ka adlaw mi-eskwela na’g balik ang maong bata.” Ingon pa, “Duha ka tuig ko siyang gisundan,” sa atubangan mismo sa napulo ka libo ka tawo. Anaa kana tanan sa . . . Aduna pa gani og usa ka retrato niini nga, panagtigum sa Seattle, diha—diha sa inyong libro. Miingon siya, “Buut kong mahibaloan ninyong tanan nga wala kamo nagapaminaw sa usa ka mini nga relihiyon. Kondili nagapaminaw kamo sa Kamatuoran.” Si Kapitan Al Farrar. Ug pagkasunod adlaw niadto giagak ko siya ngadto kang Cristo, ug nadawat niya ang bautismo sa Espiritu Santo, didto mismo sa usa ka bansayanan sa pagpamusil, sa daku nga lugar didto.

Miingon ko, “Siguro mao sàb gihapon ang buhaton niini nga tawo.”

Busa miingon ang dalaga, “Nahadlok ka ba nga moadto didto?”

¹³⁷ Ingon ko, “Nahadlok? Oy, wala gayud. Wala gayud. Nganong mahadlok man ako nga ang Dios man ang nagpadala kanako para buhaton kini? Siya man ang Maong nagapakig-away sa

gubat, dili ako.” Busa miingon ko, “Karon, gusto ko nga kamong duha dili lang manginlabot.” Ug mao nga . . .

¹³⁸ Miadto kami sa panagtigum niadtong gabhiona, napuno gyud ang maong lugar. Ug migawas ang tigbantay didto, og miingon, “Reverend Branham, nagsuhol baya ko og napulo ka batang Mexicano.” Miingon, “Tan-awa dinhi, ‘Si Reverend Branham igabutyag sa FBI karong gabhiona, ingon nga usa ka relihiyosong panatiko,’” o mora’g ingon niana. Ug miingon, “Nakapaskin kini diha sa tagsa tagsa niana nga mga sakyanan. Ipalangkat. . .” Ingon pa, “Mao nga nagsuhol ako og napulo ka batang Mexicano, para ipalangkat kana tanan ug ibutang kana dinhi.” Miingon pa, “Oh, gibati ko nga kung masakpan ko lang gyud kanang tawhana!”

¹³⁹ Ingon ko, “Ayaw’g kabalaka, sir. Ang Dios na ang modakup kaniya.” Kita n’yo? Ingon ko, “Pasagdi na lang siya.”

¹⁴⁰ Bueno mitambong gyud didto ang maong tawo. Ug niadtong gabhiona sa pagsulod namo, dili ko gayud mahikalimtan kini, misulod sa ko sa lawak. Ako. . . Si Igsoong Baxter nagpaawit og *Only Believe*. Ingon niya, “Karon, ginaingon ni Igsoong Branham niining gabhiona nga mogawas kono kami sa bilding.” Miingon, “Pero moanha lang ko dinha sa may luyo ug molingkod.” Ingon niya, “Nagaandam na kono sila nga ibutyag siya karong gabhiona dinhi sa entablado.” Ingon pa niya, “Nakita ko na baya siya sa daghan nang malisud nga mga pagpakiggubat, ug nakita ko mismo ang Dios nga mipuli kaniya.” Miingon, “Mao nga ako—moadto lang ako sa luyo para molingkod.”

¹⁴¹ Misaka ako. Miingon ko, “Bag-ohay ko lang nabasa ang usa ka hamubong artikulo dinhi nga ang ingon igabutyag kono ko karong gabhiona dinhi sa entablado.” Ingon ko, “Gusto ko nga ang mga representante sa FBI moduol na ngari karon ug ibutyag ako dinhi sa entablado.” Ingon ko, “Nagatindog ako dinhi sa pagpanalipod sa Ebanghelyo; mao nga gusto kong moduol na kamo ug ibutyag ako.” Naghulat ra ko. Ingon ko, “Tingali’g wala pa sila dinhi.” Nasayod gyud ako kon asa ako. Gipakita na man Niya kanako didto sa akong lawak, sa wala pa ako mihawa, kung unsa ang mahitabo, nakita n’yo. Ug miingon ko, ingon ko, “Siguro mohulat lang sa ako og diyutay. Mahimo ba kitang moawit og usa ka himno?” Ug adunay misaka ug miawit og usa ka solo.

¹⁴² Ingon ko, “Mr. representante sa FBI, ania ka na ba sa sulod o sa gawas? Nagahulat na ako nga mabutyag. Mahimo mo bang moduol ngari?” Wala gihapo’y miduol. Sige na hinoon ko og hunahuna kon asa kaha kadto napahimutang. Gisulti na man kanako sa Ginoo kung unsa kadto. Duha kadto ka nag-backslide na nga mga magwawali, ug ako—nagatan-aw ra ako. Nakita ko ang usa ka itum nga landong nga nagapaibabaw sa may suok.

Kabalo na dayon ko kon asa kadto napahimutang. Mitan-aw ko didto, ug mipaitaas kadto ug mipaitaas pa paingon balkonahe nga ingon niini. Usa kadto ka lalaki nga nagasul-ob og bughaw nga amerikana, ang usa pud nagasul-ob og abohon.

¹⁴³ Miingon ko, “Mga higala, wala ma’y FBI. Unsa ba’y kahilambigitan sa FBI sa pagwali sa Biblia?” Ingon ko, “Siguradong wala gayud. Sila’y dili duha ka representante sa FBI nga mao’y mobutyag kanako. Kondili, ania ang pagbutyag, anaa sila mismo nagalingkod dinha sa may itaas, silang duha nga mga magwawali dinha mismo.” Ug minaug sila. Ingon ko, “Ayaw mo’g kanaug nga nakaingon niana.” Ug duha niadtong dagkung mga taga Texas ang mosaka na unta didto ug dakpon sila. Ingon ko, “Ayaw, mga igsoon, dili man kini butang nga iya sa unod ug dugo, pabilin lang mo sa paglingkod. Ang Dios na ang bahala niana.”

¹⁴⁴ Ingon ko, “Karon, mga igsoon, tan-aw mo, samtang anaa kamo dinha sa itaas, tan-aw dinhi dapit.” Ingon ko, “Kung. . . Miingon mo nga ako mao si Simon nga salamangkero, ilalum sa pagpamalbal, nga ginalamat ko ang mga tawo.” Ingon ko, “Kung ako man si Simon nga salamangkero, kung ingon-ana kamo ang tawo sa Dios. Karon kanaug mo ngari sa entablado. Ug kung ako man gani si Simon nga salamangkero, nan pagapatyon ako sa Dios. Pero kung ako’y propeta sa Dios, nan kanaug mo ngari ug kamo ang pagapatyon sa Dios. Karon tan-awon ta kung kinsa ang husto ug kinsa ang sayup. Karon kanaug na mo ngari. Moawit kita og usa ka himno.” Nanggawas sila niadtong bilding, ug wala na namo sila makit-i sukad niadto. Kita n’yo? Ingon ko, “Umari kamo. Kung ako man si Simon nga salamangkero, nan ipapatay n’yo ako sa Dios. Ug kung propeta ako sa Dios, nan pagapatyon kamo sa Dios inig duol ninyo dinhi niining entablado. Kung tinuod ako atubangan sa Dios, nan pagatugotan sa Dios nga mamatay kamo sa ibabaw niining entablado.” Nasayod na man sila. Mao kana’y tinuod. Nasayod gyud sila. Nakabalita man pud sila gikan sa ubang mga lugar. Tinuod. Busa ayaw mo pagduhaduha nga ang Dios gayud Dios sa gihapon hangtud karon. Nagatubag Siya.

¹⁴⁵ Bueno, kadtong balbal sa En-dor, gitawag niya ang espiritu ni Samuel. Ug nakig-istorya si Saul kang Samuel. Karon, mahimong maghunahuna kamo kung giunsa kaha pagkahitabo niana. Pero dili na kana mamahitabo sa karong panahon. Dili na, sir. Tungod kay, ang dugo sa mga toro ug mga kanding nagahulat na lang man alang sa panahon sa katumanan. Pag namatay ang usa ka tawo kaniadto nga mga adlaw. . . Mga magwawali, suportahi ko ninyo kung sa hunahuna n’yong husto Kini. Pag namatay ang usa ka tawo, namatay siya ilalum sa dugo sa mananap nga pangbayad-sa-sala, ug ang iyang kalag mopaingon sa Paraiso. Ug didto magpabilin siya hangtud nianang, hangtud sa—hangtud na sa Adlaw sa Katubsanan. Ug atua ra didto ang

iyang kalag.

¹⁴⁶ I-drowing ko para kaninyo ang usa ka diyutay'ng paghulagway dinhi. Pila ba dinhi ang nakabasa sa akong artikulo, o sa artikulo nga ilang gisulat mahitungod kanako dinhi sa *Reader's Digest*, mga Oktubre, Nobyembre nga edisyon? Okey. Namatikdan ba ninyo kung unsa kadto? Namatikdan ba ninyo, mga duha o tulo ka semana sa wala pa kadto, ang kining ilado kaayo nga espiritista dinhi nga nasulayan na sa dugay nga panahon, siya, si Miss Piper. Aduna ba dinhi ang nakabasa na nianang, artikulo bahin kang Miss Piper diha sa *Reader's Digest*? Dili ba katingalahan kung unsa nga ang maong duha ka espiritu . . .

¹⁴⁷ Unsa pa ba ka taas ang akong oras? Gamay na lang. Milagpas na gani ako og baynte minutos, mao nga kinahanglan na gyud kong magdali. Kabalo ko nga aduna pa baya kamo'y . . . Matikdi, pasensyahi sa ko ninyo sa makadiyut.

¹⁴⁸ Kabalo na man mo nga, adunay—adunay mini. Aduna gyu'y usa ka tinuod ug usa ka mini sa tanang butang. Ngani kung hatagan ko kamo og usa ka dolyar, ug moingon ko, "Tinuod ba kini nga dolyar?" Ug kon tan-awon n'yo kini, kinahanglan nga susama gayud kini sa usa ka tinuod nga dolyar kay kon dili nan dili n'yo kini toohan. Husto ba? Busa kinahanglan kining mamahimong usa ka maayo gayud nga pagkasundog.

¹⁴⁹ Ug mao nga miingon si Jesus nga ang maong duha ka espiritu sa kaulahiang mga adlaw halos magkapareho na gayud hangtud nga malimbongan niini ang mismong mga Pinili kon mahimo pa, relihiyoso nga mga tawo. Karon hinumdumi n'yo. Karon, wala man gyu'y bisan unsa nianang mga ma- . . . po- . . . mabugnaw, og pormal. Sa panggawas aduna lang sila'y dagway sa pagkadiosnon, nakita n'yo. Apan kining maong duha ka espiritu, ang tinuod nga mga espiritu, halos magkapareho na gayud hangtud nga malimbongan niini ang mismong mga Pinili, og daw sa unsa nga dungan silang nagapamuhat sa kaulahiang mga adlaw. Gisulti ba ni Jesus kana? Gisulti gyud Niya.

¹⁵⁰ Karon matikdi n'yo, mga higala, mag-drowing sa ko para kaninyo og usa ka diyutay'ng paghulagway. Buut ko nga motan-aw kamo dinhi sa makadiyut. Ug ihatag n'yo kanako ang inyong bug-os nga pagtagad, tungod kay hatagan ko kamo og usa ka samingay, ug aron masabtan ninyo kini.

¹⁵¹ Karon, diha sa *Reader's Digest*, dunay naisulat dinha, nga atua ako didto, nagkaaduna kami og baynte-siete ka gatus nga mga tawong nanaghulat para maiampo, nga nanagtindog didto. Basaha ninyo ang maong artikulo. Ug dunay usa ka tawo ang miabot nga gikan pa sa Canada, ug duna siya'y batang lalaki nga gidala na didto sa Mayos ug sa John Hopkins, tungod sa usa ka grabe nga sakit sa utok nga naghinungdan nga mikulo na ang gagmay niyang mga kamot nga mamaingon *niini*, ug mikulo na

puḁ ang mga bitiiḁ niini. Ug miingon sila, “Wala na gayu’y usa ka operasyon o unsa man nga mahimo pa.”

¹⁵² Busa gidala niya ang bata pabalik sa Canada. Ingon siya, “Dili pa ako pildi.” Pag aduna na kamo og pang-Nobyembre nga edisyon sa *Reader’s Digest*, may ulohan kana nga—nga *Ang Milagro para kang Donny Morton*. Ug—ug dayon gikaingon dinha, nga ang, nga ang—nga miingon ang maong tawo, “Dili pa ako pildi, tungod kay duna man ko’y nailhan nga usa ka mananambal pinaagi’g pagtoo nga ginganla’g William Branham, nga mao’y hinungdan nga ang akong duha ka higala nga bungol ug amang nakasulti ug nakadungog na.”

¹⁵³ Ug mitawag sila sa pagpaninguha nga mahibaloan kung asa ako dapit, sa—sa Amerika. Ug atua man ako niadto sa Costa Mesa, California. Ug kanang usa ka artikulo, pagmabasa n’yo kana, pangandam na lang mo sa paghilak. Tungod nga mahugno gayud ang inyong kasingkasing niana. Kon daw sa unsa nga miagi siya latas sa mabaga’ng mga niyebe, ug tanan nang uban pa, nga dala kadtong bata! Ingon siya, “Mag-amping ka, Donny.” Miingon, “Karon, dili pa kita pildi.” Ug ang luoy’ng batang lalaki dili na gani makapahiyom, halos, nag-antus gyud siya og ayo. Ingon pa, “Dili pa kita pildi, mangamuyo kita sa Dios. Moadto kita sa propeta sa Dios ug hangyoon nato siya.”

¹⁵⁴ Ug niadtong tungora miagi sila latas sa mga niyebe. Ug sa katapusan nakadangat ra gyud sila didto, ug kauban man unta nila ang maong inahan, pero tungod wala man sila’y igong kuwarta para moadto nga sakay sa eroplano, busa ila na lang gipabalik ang inahan. Ug kinahanglan nang moadto ang batang lalaki ug ang amahan nga sakay sa usa ra ka bus, ug mibiyahē sila gikan pa sa Winnipeg, Canada, paingon sa Costa Mesa, California. Ug nakadangat sila didto, nga wala gyu’y unsa man, ug nanugilon ang amahan nga kinahanglan pa gyud kono niyang ilisan og mga lampin, sa luoy’ng batang lalaki nga mga siete o otso anyos na ang pangidaron, nga wala gayu’y mahimo sa kaugalingon niini. Ug kung unsa nga siya . . . dili pud kono siya makahigayon para mokaon o unsa man, ug ingon pa nga basta lang kono ang iyang batang lalaki madungog siya nga magsulti. Ug sa paagi pa lang nga motan-aw ang mga mata sa bata hingsayran na niya, nga siya’y—siya’y gapaningkamot gyud nga mopahiyom, kabalo na mo. Ug nasayod nga siya . . . Ginasultihan pud kono niya ang bata sa nagkalainlaing mga talan-awon nga iyang nakita, sa Amerika.

¹⁵⁵ Ug sa dihang nakadangat na sila didto, sa California, ilang giingnan ang nagatabang sa mga biyahedor, kung unsay iyang giadto didto para makita. Miingon ang katabang, “Mianhi mo para makita ang usa ka Balaan nga unsa?” Ug usa gyud ka dakung pangutana.

¹⁵⁶ Siyempre, mahunahuna n’yo mismo kung unsay gikasulti

sa Amerika mahitungod niini, nakita n'yo. Kita n'yo, ingon niana man gud kitang mga Amerikano, kita n'yo, "Utokan kaayo kita! Nasayod kita sa tanan-tanan, kabalo na mo, ug dili na kinahanglan nga sultihan pa kita og unsa man. Nasulat na nato ang tanan." Kita n'yo?

¹⁵⁷ Ug niadtong tungora, ingon, "Usa ka Balaan nga unsa? Dayo mibiyahе gyud mo gikan pa sa Winnipeg, Canada?" Hinoon, nakahunahuna gyud ang maong mga tawo nga makaluluoy gyud sila.

¹⁵⁸ Bisan pa man, ang maong mantalaan duna na'y giandam nga usa—usa ka sakyanan ug gipahatud siya didto. Ug ingon siya, sa dihang nakadangat na kono sila sa linya, kon diin kadto gipahigayon, miingon nga duna kono'y baynte-siete ka gatus nga mga tawo ang nanaghulat para maiampo. Apan miingon, sa dihang nakita nila kadtong nakimpang na, og luoy'ng tanawon nga batang lalaki, ug kadtong makaluluoy'ng amahan nga nakasul-ob og kalo, og gisi-gisi na niyang amerikana, ang ingon nga nagpadaplin kono ang tanan ug gipauna siya. Pero sa pag-abot na niya sa entablado. . .

¹⁵⁹ Supak man gud sa patakaran ang magbayloanay og prayer kard. Ang usa ka tawo kinahanglan motambong gyud sa panagtigum ug mokuha og iyaha mismong kard. Kung masakpan man mo diha sa linya, nga gibaylo mo ang imong prayer kard ngadto sa uban, nan maimbalido ang maong prayer kard. Kita n'yo? Tungod kinahanglan n'yo mismong motambong para mapaminawan sàb ang mga pagtudlo ug kung unsaon nga makadawat niini. Ikaw gyud mismo. Dili puedeng ikaw ang mokuha niini para sa uban. Kinahanglan n'yong motambong para kamo mismo ang mokuha niini, aron sàb makadungog kamo. May usa ka bantugang tawo ang miingon, "Kung. . . Bueno, dili man kaayo ko nagatoo sa ingon niining butang. Apan, siguro kung ayohon Niya ako, ako'y. . ." Nakita n'yo? Ug bueno maghinungdan man gud kana og kaguliyang sa entablado, busa kinahanglan nilang dili na ipaapil ang ingon niana sa dili pa kana moabot didto.

¹⁶⁰ Ug sa dihang miduol na ang batang lalaki, o ang amahan miduol na sa entablado, nga nauna pa sa mga tawo, gipangayo ni Billy sa iyaha ang iyang prayer kard. Pero wala man siya'y bisan usa. Mao nga giingnan, "Bueno pasensya na, sir." Ingon, "Kinahanglan pa gyud nimong maghulat."

¹⁶¹ Ingon siya, "Sige." Miingon, "Maghulat ko." Miingon, "Hulaton ko na lang ang akong turno sama sa uban, kung ingon-ana." Ingon pa, "Wala man gud ko kabalo nga kinahanglan pa diay kong mokuha niini."

¹⁶² Ug samtang nagpakig-istorya ko sa usa ka tawo, nahitabo pud nga nadungog ko kadto. Nakita ko ang maong amahan nga mihawa na, ug ingon ko, "Unsa ma'y problema?"

Ingon ni Billy, “Wala siya’y prayer kard.”

Ug Adunay miingon kanako, “Pabalika siya.”

¹⁶³ Busa miingon ko, “Pabalika siya dinhi.” Ug miduol ang amahan, ug nagadagayday na ang mga luha diha sa iyang nawong, nga kinahanglan nang mahimungotan. Ug siya—misaka siya, ug ania ang gisulti sa *Reader’s Digest*. Kita n’yo? Wala na ako nangutana, kondili diretso na kong mitan-aw mismo sa nawong sa bata, gisulti mismo kon taga asa ang bata, nga gikan na kadto sa Mayos Clinic, ug tanan na mahitungod sa kung unsay problema niadto, kung unsa na kadto ka grabe, ug tanan na.

¹⁶⁴ Ug busa nagsugod nang mihilak ang maong amahan, ug hinay-hinay na unta siyang mihawa. Ug ang ingon nga samtang panaug na siya sa entablado, ug mibiyo siya, ingon niya, “Tinuod kana, sir.” Ingon siya, “Apan mabuhi pa ba ang akong anak?”

¹⁶⁵ Ingon ko, “Dili ko makasulti niana.” Ingon ko, “Kadali lang.” Nakita ko ang usa ka panan-awon nga mitungha. Ingon ko, “Mahimong dili na nimo gustong toohan kini, tungod kay pareho na mang nagsulti ang Mayos ug ang Hopkins ingon dili na puedeng buhatan ang pag-opera sa utok, apan sultihan ta ka kung unsay imong buhatan. Ikaw, ugma, padayon ka lang uban niining bata. Sulod sa sunod nga tulo ka adlaw duna ka’y matagbo diha sa dalan nga usa ka babaye nga itum ang buhok, ug mangutana kanimo ang maong babaye kung unsay problema niini nga bata. Ug dayon sultihan ka niya mahitungod sa usa ka taga-banwa nga doktor dinhi nga makahimo niana nga operasyon, ug dili na nimo gustong toohan kana, tungod nga gibalibaran na man kini sa Mayos ug miingon nga, ‘Imposible na nga maoperahan pa.’ Apan mao lang kana ang bugtong kahigayonan sa imong anak, pinaagi sa gahum sa Dios, sa kalooy sa Dios ug sa maong operasyon. Karon, kung nagatoo ka kanako nga Iyang propeta, nan buhata ang sumala sa akong giingon.” Sama ra nga nagbutang ka og higuera kang Ezechias, ug ingon niana.

Ingon siya, mibiyo siya ug miingon, “Salamat.” Dayon milakaw na.

¹⁶⁶ Duha ka adlaw o sobra pa ang milabay, ug anaa siya sa dalan usa niana ka adlaw, ug dunay usa ka babaye ang miduol, miingon, “Unsa ma’y problema sa imong anak?”

¹⁶⁷ Miingon, “Aduna kini og—og ka sakit sa utok.” Ug padayon siya nga nakig-istorya nga ingon niana. Ug, bueno, sila—nahunahuna man gud nila nga grabe na gayud kadto, kabalo na mo.

¹⁶⁸ Ug ingon siya nga sulod sa pipila kono ka minuto adunay nahitabo. Miingon ang babaye, “Sir, duna ko’y kaila nga makahimo niana nga operasyon.”

¹⁶⁹ Miingon siya, “Gining, ania, misurender na man niana ang Mayo Brothers ug miingon nga dili na kana kono maoperahan

pa.” Miingon, “Pero may usa ka tawo dinhi ang nag-ampo para niini, nga ginganla’g Igsoong Branham.” Miingon, “Nag-ampo na siya para sa bata.” Ingon pa siya, “Kadali lang! Itum ang buhok, nagasul-ob og abohon nga kupo.” Miingon, “Mao na kini siya.” Miingon, “Asa man kana nga doktor?” Ug gisulti niya kaniya. Gidala niya ang bata didto ug gibuhat sa doktor ang maong operasyon, og naayo na ang bata.

¹⁷⁰ Karon, namantala kana diha sa *Reader’s Digest*, nakita n’yo. Ug gitawgan ako sa Mayo Brothers para sa usa ka pakighinabi mahitungod niadto. Miingon, “Rev. Branham, unsa ma’y imong gibuhat sa bata?”

¹⁷¹ Ingon ko, “Wala. Wala ko gani gihikap kadto. Kondili igo ko lang gisulti kung unsay gisulti sa Dios kanako nga igasulti sàb niadto. Gituman kadto sa maong tawo.”

¹⁷² Karon, ang kataw-anan nga butang mahitungod niini, mga duha ka semana pagkahuman niadto, o duha ka semana sa wala pa kadto, o kaha tulo, diha sa *Reader’s Digest*, siguro nauna lang og usa ka bulan, nga gimantala ang artikulo bahin kang Miss Piper. Bueno, usa siya ka tinuod nga balbal, o usa ka espiritista. Karon, ingon nga adunay usa ka tinuod, ug aduna sàb gyu’y magsundog-sundog. Ilado na nila kana nga babaye sukad pa niadtong 1897. Sobra usa ka gatus anyos na ang iyang pangidaron karon, didto sa New York, pareho... bungol na maingon sa usa ka poste. Ang *Reader’s Digest*, ang nagmantala... sa hunahuna ko namantala kini mga duha ka bulan o usa ka bulan adisir ang sa akoo; ug mabasa ninyo kini, sa unang tinglagas nga edisyon. Nagdala niini si Mr. Baxter niadtong miaging adlaw. Kung nahunahunaan ko lang unta kini, siguro ako nang gipadala kaniya... o kon nasayod lang unta ko nga hisgotan ko diay kini, nan akong—nakadala unta ako niini. Makakuha man ko niini para kaninyo. Ug aduna kini’y mga dose o katorse ka panid. Usa lamang siya ka ordinaryo nga asawa. Ug nahiadto kono siya sa usa ka panan-awon usa niadto ka adlaw, samtang anaa sa pag-antus, ug misugod na siya niadto nga nakigsulti sa mga patay. Ug gidala na nila kana nga babaye sa tibuk kalibutan, sa bisan asa. Gidala nila siya sa England. Ginailisan pa gani kono ang iyang mga sinina, sa makadaghang higayon, ug tan-awon kung masayup ba ug mga ingon-anang butang, ug nakadangat didto ug adunay usa ka tawong nagpakaaron-ingnon og nagsul-ob og maskara sa nawong, usa ka Griyego, ug nagpakaaron-ingnon aron nga mora gyud siya og usa ka taga-Inglaterra. Ug gisulti niya sa maong lalaki ang tanan mahitungod niadto. Ug siya—siya—gusto kono niyang tawgon ang usa sa iyang mga kauban nga patay na.

¹⁷³ Karon, ang bugtong butang nga iyang... Sa tibuk kalibutan, ug ania ang gisulti sa *Reader’s Digest* dinha, ngani dinhi pipila pa ka gabii ang milabay, o pipila na ka bulan ang milabay, nabutyag ang usa sa ingon nianang mga butang. May

usa ka lalaki kono nga mihalok sa mora'g multo na nga kamot sa iyang inahan, ug pagkasunod adlaw napamatud-an sa korte sa kapulisan nga ang gihalokan niya usa lang diay ka panapton nga pangputos sa keso. Pagkadaghan gayu'ng mga tawo ang nagaawat-awat sa usa ka espiritista! Ngani sila kining mga magbabasa nga anaa dinha sa daplin sa dalan, nga dili man gyud unta mga espiritista sa sugod pa lang. Sila walay lain kondili mga mini nga manunundog. Apan aduna gyu'y usa ka tinuod nga espirista.

174 Ug kita nga mga tawong relihiyoso, aduna man sàb og daghang mga manunundog kanato. Karon magpabilin lang nga hilom sa makadiyut.

175 Karon matikdi n'yo, si Miss Piper usa siya ka tinuod nga espiritista. Ug ngani miingon ang magasin, “Ania ang usa ka butang nga mahimong sigurado, nga, pag namatay ang usa ka tawo, dili siya patay. Kondili nagapuyo lang siya sa kon asa man, tungod kay mahimo man tawgon sa niana nga babaye ang ilang espiritu ug nagapakigsulti pa sa maong mga tawo.”

176 “Karon, unsa ma'y ginabuhat niya, Igsoong Branham? Nagatoo ka diay niana?” Oo, sir. Mao man ang ginaingon sa Biblia, mao kana'y hinungdan nga nagatoo ako niana. Pero ang maong babaye iya gyud sa yawa. Tungod ang espiritismo pamaagi man sa yawa. Karon matikdi, karon bantayi n'yo ang maong duha.

177 Ug kon nakita lang unta ninyo ang mga sulat nga gipadala kanako, pagkahuman, nga ang akong artikulo gimantala human sa iyaha. Dili ba kahibulongan nga, sa dili pa ang katapusan sa panahon, gisulti sa Dios kining mga butanga? Ug ang *Reader's Digest* namantala man sa matag pinulongan ilalum sa langit. Kita n'yo? Matikdi, dili ba kahibulongan nga nagsunod lang ang pagmantala kanila?

178 Bueno ania na ang mga sulat nga nangabot, dunay miingon, “Igsoong Branham, nagapamatuod lang kana nga ikaw walay lain kondili usa ka espiritista.” Miingon, “Nagapamatuod kana. Tan-awa dinhi, gisultihan mo kadto nga babaye kon diin niya makaplagan. . . Tan-awa *kini* nga babaye?”

179 Ingon ko, “Kadali lang.” Aduna ako'y usa ka opisyal nga sulat, (pasayloa ko), aron ipadala sa mga tawo. Ingon ko, “Pagkagamay ra gyud sa nahibaloan ninyong mga magwawali.” Ingon ko, “Imbis nga ang inyong lawas ang bautismohan, ang inyong mga utok man diay ang kinahanglan bautismohan.” Tinuod kana. “Wala kamo nagahunong sa paghunahuna og mga butang. Pero wala kamo naninguha sa paghunahuna niini.”

180 Ingon niana usab ang ilang gibuhat sa kaniadto nga mga adlaw. Nakita nila si Jesus. Nasayod sila nga mahimo Niyang. . . hingsayran Niya ang mga tinago sa ilang kasingkasing. Hingsayran Niya nga sama niana kung unsa ang ilang

mga ginabuhat kaniadto. Ug miingon sila, “Siya mao ang pangulo sa mga yawa. Siya’y Beelzebub, ang pinakabanggiitan manghihimalad sa kalibutan.” Pero wala gyud sila mihunong aron pamalandongan unta kadto, nga makita nga Anak sa Dios diay kadto. Hinoon dili man gud sila ingon ka espirituhanon aron maila kadto. Mao kana, sa ilang pagbasa gilagpasan ra nila ang maong butang. Tinuod man, nga gipaabot na nga mosulod si Jesus sa Jerusalem, nga nakasakay sa usa ka mula, ug uban pa, apan ang ikaduhang Pag-abot man ang ilang ginahulat.

¹⁸¹ Ug mao ra gihapon sa karong panahon! Nagatan-aw sila ibabaw ra sa tinuod nga butang. Alleluyah! Tinuod kana. Kabalo ko nga ania ang Dios, niining hapona, ug kabalo ko nga nagamit ko na og ayo ang inyong panahon, apan kinahanglan gyud ninyong makita kini, higala. Kung dili ko na kamo makita pag-usab, kinahanglan ninyong mahibaloan kung unsa ang mga demonyo, kinahanglan ninyong mahibaloan kung unsa ang Kamatuoran ug ang sayup. Ug halos magkapareho na gayud kini, mao nga kinahanglan n’yong ihimulag ang maong butang.

¹⁸² Karon hinumdumi n’yo, dili baya kini mahimong maanaa dinha, usa ka butang nga anaa dinhi *niining* dapita sama sa mga Fariseo, o usa ka butang nga anaa dinha *nianang* dapita. Kondili anaa kini mismo sa pultahan, tapad mismo niini. Matikdi kini. Karon kung nakuha ko man . . .

¹⁸³ Atong ipananglitan ang maong duha ka matang. Kung mokuha ako ug mohatag kaninyo og dolyar, pero, usa diay ka mini nga dolyar ang gihatag ko kaninyo. Mogamit sa kita og samingay aron masabtan n’yo kini. Ang unang butang nga imong buhaton, kung usa ikaw ka utokan nga tawo, kung mokuha ka og usa ka dolyar ug tan-awon kana, ang unang butang, imo kanang hilamon ug tan-awon kung gama kana sa usa. Husto ba? Tan-awon nimo kung sa unsa gyud kana gigama. Tan-awon pud nimo ang bili niana. Ang usa ka tinuod nga dolyar dili man hinimo ra sa papel, may bahin niini nga papel ug duna pu’y seda, nakita n’yo. Ug ang unang butang, kinahanglan gyud nimong tan-awon ang bili niana. Mao kana ang unang ilhanan.

¹⁸⁴ Ug karon dalhon nato ang espiritista dinhi *niini* nga bahin; ug dalhon pud ang Ginoo dinhi *niini* nga bahin, nga may kahilambigitan kanato.

¹⁸⁵ Karon tan-awa, ang unang butang nga kinahanglan n’yong himatikdan, ang tanan. . . Tan-awa ninyo ang artikulo. Sulod sa sobra singkwenta na ka tuig nga iyang pagpanghimalad, ug pagtawag sa mga espiritu sa mga patay, wala gyud ni usa ka higayon nga iyang nahisgotan ang Dios, si Cristo, ang Balaanong pagpang-ayo, kagawasan, Paghukom, o unsa man. Wala gyu’y unsa man gawas sa pagsadya-sadya ug kabuungan.

¹⁸⁶ Apan dinhi *niini* nga bahin, kanunay gayud nga Dios, Paghukom, Pag-abot ni Jesus, Balaanong pagpang-ayo, gahum

sa Dios, og kagawasan. Tan-awa n'yo ang bili niini. Wala baya kamo'y makita nga mga manghihimalad ug mga balbal nga nagawali sa Ebanghelyo. Pero unsa ma'y nagakahitabo sa mga tawo? My! Matikdi n'yo!

¹⁸⁷ Ug ang tinuod nga butang nga buhaton, kung gusto nimong masayran kon kini ba'y usa ka tinuod nga dolyar o dili, kung ang itsura niini susama gayud niini, nan kuhaa ang mga numero niini ug ipadala kini'g balik ngadto sa gam-anan og kuwarta. Ug kung aduna ma'y mga numero didto nga motukma niini, nan adunay usa ka pilak nga dolyar nga nagahulat para niini. Husto ba?

¹⁸⁸ Bueno, kung ingon-ana, igsoon, susiha ang ginabuhat sa maong babaye ug ikumpara kana sa Biblia, og inyong mahibaloan nga ang balbal kana sa En-dor.

¹⁸⁹ Ug susiha ninyo kung unsa ang ania dinhi, og inyong mahibaloan, nga anaa kini dinhi sa Basahon nga Gam-anan, "Si Jesus Cristo mao sa gihapon kagahapon, karon, ug hangtud sa kahangturan." Walay pagduhaduha, mao ra gayud sa Iyang buhat! Dili Siya nagabinuang ug nagatinonto sa mga tawo. Kini'y alang gayud sa usa ka kaayohan, aron tabangan ang tawo, aron maagak sila ngadto sa Dios. Amen! Wala ako "naga-amen" sa akong kaugalingon, tungod ang *amen* nagakahulogan man og "hinaut unta." Ug ako'y . . . nagatoo ako Niini. Nasayod ako nga Kini mao ang Kamatuoran.

¹⁹⁰ Karon matikdi, ania kamo. Karon, sa gilayon ha, tungod kay dili ko gusto nga langanon pa kamo.

¹⁹¹ Ania, maghulagway ta og gamay'ng paghulagway dinhi, usa ka gamay'ng paghulagway sa panghunahuna. Ania'y usa ka sapa dinhi mismo, paingon mismo sa *niini* nga direksyon, nagapaingon ang kinabuhi. Karon tan-awa. Usa kini ka agianan. Ihatag n'yo kanako ang inyong bug-os nga pagtagad karon, aron dili ninyo masayloan kini. Paingon mismo sa ingon *niini*. Karon, sa niining gamay'ng agianan dinhi nagapuyo ang mga tawo, kamo ug ako. Karon, dinha, atong tan-awon kung unsa kana. Usa kana ka pundok sa kabuangan ug tanan nang uban pa, apan usahay makakita kamo og kahayag. Makakita pud kamo og kangitngit ug mga dalan, nga may mga paghudyaka ug kung unsa na lang nga pagsadya-sadya, ingon nga ginakontrolar sa mga yawa ang mga tawo. Oh, maayo ang ilang pagpangbisti, my, ug hataas gayud og iniskwelahan, hinashasan nga mga eskolar, apan yawa diay sa gihapon. Pero aduna pu'y natawo na pag-usab nga anaa dinha.

¹⁹² Karon, kining mga tawo sa niini nga agianan naimpluwensiyahan sa duha ka managlahi nga bahin. Karon, sa niini nga bahin paingon *niini* nga direksyon, adunay trinidad. Ug sa niini nga bahin paingon *niini* nga direksyon, aduna pu'y trinidad.

¹⁹³ Bueno, pag, karon ang unang dapit, sa *niini* nga bahin, mao ang mga kalag sa mga *dili-matarung*, pag namatay ang usa ka dili-matarung mopaingon siya sa usa ka dapit og maghulat na sa paghukom. Ngani miadto man si Jesus ug nagwali niadtong mga kalag nga atua didto sa bilangoan. Ang sunod mao'y sa mga demonyo. Ang sunod na pud, mao'y sa yawa nga anaa sa impiyerno. Sa itaas, ang una, bueno, sila diay nga mga anaa dinha mao ang mga kalag, mga espiritu sa patay na nga mga tawo nga wala nanaghinulsol. Nagahulat sila alang sa Paghukom. Tungod ang bugtong butang nga ilang nahibaloan mga kabuangan ra man ug kung unsa nga ilang gipangbuhat.

¹⁹⁴ Karon, dinhi sa itaas, kini ang mga Cristohanon nga naimpluwensiyahan gikan sa Kahitas-an. Samingay ra kini. Dinhi sa itaas ania ang usa pa ka Espiritu, ang Espiritu Santo, ang Espiritu sa usa ka Lalaki, nga si Jesus Cristo. Ang Espiritu Santo, ang Espiritu Santo ang nagaimpluwensiya sa Iyang Iglesia sa niining mortal nga dapit.

¹⁹⁵ Ang yawa pud, pinaagi *niini* nga mga espiritu, ginaimpluwensiyahan niya ang tawo. Karon, tan-awa, ang sunod mao'y sa mga Manulonda. Ang sunod mao'y sa Dios. Karon, ang matag mortal dinhi naimpluwensiyahan sa usa sa niini nga mga kalibutan. Nasabtan n'yo ba ang buut kong ipasabot?

¹⁹⁶ Karon ang gibuhay sa maong babaye, misulod siya niana nga dapit. Ug nagapakigsulti siya niadtong giyawaan nga mga tawo nga, sa sinugdan, mao ang mga espiritu sa nahulog nga mga anghel nga wala nanaghinulsol sa sinugdan kaniadto, ug nagtugot ra nga makontrolar ang ilang mga kinabuhi niana. Ug nagahulat sila alang sa Paghukom.

¹⁹⁷ Ug *kinining* mga ania dinhi naimpluwensiyahan sila ug natawo na pag-usab pinaagi sa Espiritu sa Dios. Ug ang yawa aduna siya'y mga propeta, ug ang Dios aduna pu'y Iyaha. Nasabtan n'yo ba ang buut kong ipasabot? Tungod sa impluwensiya, ug mao kana. Hunong sa mo aron ihimulag kana. Si Jesus, kaniadtong ania pa Siya sa yuta . . .

¹⁹⁸ Bueno, karong panahona, dili na ang maong babaye makahimo sa pagsulod niana nga dapit ug ipahigawas ang usa ka matarung nga tawo gikan niana nga dapit. Dili na niya mahimo kana, tungod kay ang mga matarung wala na man dinha sa kon asa sila kaniadto, sa Paraiso. Wala na, sir. Giwala na man ang Paraiso, sa dihang giwala kini sa Dugo ni Jesus. Tan-aw mo dinhi. My!

¹⁹⁹ Kung hunahunaon ko gayud kon daw sa unsa nga si Jesus, sa dihang Siya namatay, miadto Siya ug nagwali sa mga kalag nga atua sa bilangoan. Namatay Siya, nga usa ka makasasala, bisan walay nailhan ni usa ka sala, apan tungod ang atong sala anaa man Kaniya. Ug ang Dios, tungod sa Iyang mga sala, gipadala

Siya ngadto sa impiyerno. Ang Biblia miingon, “Siya miadto ug nagwali sa mga kalag didto.”

²⁰⁰ Ginaingon sa pipila ka mga tawo, “Igsoong Branham, wala ako makasabot niini.” Miingon, “Nabanhaw si Jesus sa ikatulo ka adlaw. Namatay Siya Biyernes sa hapon ug nabanhaw pagka-Dominggo sa buntag, aba, namatay diay Siya sulod sa usa lang ka adlaw.”

²⁰¹ Ingon Siya, “Sulod niana nga panahon,” tungod aduna man Siya’y usa ka Kasulatan sa Biblia, nga Iyang mabarugan. Kay, si David, ang usa ka tawo nga nag-backslide kaniadto, apan siya naluwas, og ingon nga usa ka propeta nga anaa ilalum sa inspirasyon sa Dios, miingon, “Dili Ko pagabiyaan ang Iyang kalag didto sa sheol, ni motugot Ako nga ang Akong Balaan makakita og pagkadunot.” Ug nasayod gyud siya, nga sa tulo ka adlaw ug gabii, kadtong lawasa mosugod na sa pagkadunot. Ug gisulti na man sa Dios ngadto sa propeta, “Dili Siya makakita og pagkadunot.” . . . ? . . . [Blangko nga bahin sa teyp—Ed.]

Alleлуйah! Gitoohan Niya ang Pulong sa Dios. Gibuntog Niya si Satanas, sa matag higayon, pinaagi Niini. Gibuntog Niya ang kamatayon, pinaagi sa Pulong sa Dios. Alleлуйah! Gibuntog gyud Niya ang kamatayon. Ug sa dihang gipatay na nila Siya, ug namatay Siya, ingon nga usa ka makasasala, tungod nga ang akong mga sala ug inyong mga sala anaa man Kaniya, og mikanaug Siya didto, makita ko Siya nga nanuktok niadtong pultahan didto.

Ug migula kadtong nangalaglag nga mga kalag ug miingon, “Bueno, si Kinsa Ka ba?”

²⁰² Ingon Siya, “Ngano man nga wala kamo kaniadto nagpatalinghug kang Enoch? Ngano man nga wala kamo nagpatalinghug sa uban pa niadtong mga propeta nga nanagwali?” Pero hinukman na man sila. “Ako mao ang Anak sa Dios nga sa makausa nabuhi. Ako’y . . . Giula na ang Akong Dugo. Mao nga mianhi Ako aron sultihan kamo nga, Akong gituman, kung unsa man ang gisulti sa mga propeta nga pagabuhaton Ko.” Gilabyan mismo ang mga demonyo, og mipaingon mismo sa impiyerno, nga gikuha ang mga susi sa kamatayon ug impiyerno gikan sa yawa, gisab-it dayon ang mga niini diha sa Iyang kilid, og mibalik paitaas. Alleлуйah!

²⁰³ Pabanag-banag na niadto sayo sa buntag. Alleлуйah! Mag-drawing tà og usa ka gamay’ng hulagway dinhi. Sayo niadto sa buntag, adunay usa na usab ka grupo ang atua didto sa Paraiso. Pero wala na sila dinha karon.

²⁰⁴ Karon, kamong bantugan nga mga higalang Katoliko nga nagatoo sa pagpangaliya sa mga santo. Kung nagapakigsulti kamo sa usa ka santo sa inyong iglesia, kana nga tawo usa man ka makasasala, anaa siya sa impiyerno, o—o nagahulat na didto alang sa paghukom kaniya. Ug kung usa gyud siya ka balaan,

nan siya'y anaa na unta sa himaya sa Dios ug dili na mahimong mobalik pa. Mao kana'y tinuod. Mapamatud-an ko kana. Ang dugo sa mga toro dili man makatangtang sa sala, kondili ang Dugo lang ni Jesus ang maoy nagwagtang sa mga sala.

²⁰⁵ Makita ko si Jesus nga misaka didto kon diin, ang Paraiso, atua didto ang tigulang nga si Abraham, Isaac ug si Jacob, ug sila nga atua didto, si Samuel ug ang tanan nang uban pa kanila didto. Madungog ko Siya nga nagatuktok sa pultahan. [Ginatuktok ni Igsoong Branham ang pulpito sa makaunom ka higayon—Ed.] Amen! Oh, gusto ko gayud kini. Nagakahimo ako mismong. . . medyo mibati og pagdihog karon. Makita ko Siya nga nagalantaw didto. Madungog ko siya nga nagaingon, “Kinsa ba ang anaa dinha? Kinsa ba Kining anaa dinha?” Ingon siya, “Ako, si Abraham kining nagasulti. Kinsa ba Kini?”

²⁰⁶ “Ako mao ang Binhi ni Abraham.” Amen. Makita ko si Abraham nga miduol sa pultahan, og giablihan ang pultahan. Ingon Siya, “Ako mao ang Binhi ni Abraham.”

Miingon si Daniel, “Tan-awa n'yo didto! Mao man kanang Bato nga akong nakita nga natapyas gikan sa bukid.”

²⁰⁷ Madungog ko usab si Ezekiel nga nagaingon, “Mao gyud kana Siya! Nakita ko na Siya, sama sa abog ilalum sa Iyang mga tiil, ang mga panganod nga nagalihok, sa dihang ang mga laki nga karnero. . . gipalakpak ang ilang mga kamot, ang mga dahon, ug silang tanan nanagsinggit.” Oh, makita ko mismo ang nagkalainlaing uban pa didto sa Paraiso, nga nagahulat Kaniya.

²⁰⁸ Madungog ko Siya nga nagaingon, “Umari kamo! Pabanag-banag na didto sa Jerusalem. Kinahanglan na natong mogawas dinhi. Mosaka na kita, tungod kay misalig man kamo sa dugo sa mga toro ug mga kanding, nga nagahulat alang sa panahon sa Akong Dugo. Apan ang Akong Dugo giula na man didto sa Kalbaryo. Ako mao ang nagpakatawo nga Anak sa Dios. Mao nga ang tanang utang tungod sa sala nabayran na. Ania na kita nga pagawas na!” Alleluyah! Himaya sa Dios!

²⁰⁹ Makita ko si Abraham nga gigunitan si Sarah sa may bukton, ug ania sila, nga nagagawas na mismo! Sa Mateo 27, sa dihang migawas siya, madungog ko sila nga nanghunong kadali didto dapit sa Jerusalem. Ug mahibaloan mo na lang, makita ko sila ni Caifas nga nagatindog didto sa dalan, nga nagaingon, “Ingon sila kanako nga nabanhaw kono kanang tawhana. Oy, kinsa man kanang lalaki nga gapadulong didto; kanang batan-ong lalaki, og kanang batan-ong babaye?”

²¹⁰ Dili na gayud mga tigulang; si Abraham kadto ug si Sarah. Ug nangawala sila. Mitan-aw sila, “Adunay nagatan-aw kanato.” Mahimo na man gud nilang mawala sama lang niadtong milusot si Jesus sa bungbong, mao gihapon kadto nga matang sa lawas. Alleluyah! Tinuod. Ania ang tanang mga propeta ug

silang uban pa, nga nagalakaw-lalakaw, nagatan-aw palibot sa siyudad.

²¹¹ Ug gipangunahan sila ni Jesus pakayab sa itaas, o didto ibabaw sa mga bitoon, bulan, mga kawanangan, ug gidala ang panon sa mga bihag, og nanghatag og mga gasa sa mga tawo. Nagalingkod karon si Jesus sa too sa Amahan, misaka didto, og milingkod, hangtud nga ang tanan Niyang mga kaaway nahimong tumbanan sa Iyang mga tiil.

²¹² Ug karon, minahal kong higalang Cristohanon, ang mga demonyo nagapamuhat mismo sa bisan asa. Ug ang Espiritu sa Dios nagapamuhat sàb mismo, sa pikas bahin, aron batokan kana sa tanang panahon. Alleluyah! Mao kana. Ngani ang mga mantalaan ug mga magasin ug tanan nang uban pa nagapamahayag man niini. Nagabantay pud sila niini. Pero dili sila makakita kung unsa kini. Unsa man kini? Kini mao ang paghulagway nang daan mahitungod sa dakung pagpakigsangka nga hapit nang mahitabo, tali sa Dios ug sa yawa. Mao nga dapigi gyud ninyo ang Dios ug magmatarung sa inyong kasingkasing. Amen.

²¹³ Dili pa lang dugay atua ako didto sa Toledo, Ohio, nga nagapahigayon og usa ka panagtigum. Magatapos na ko.

²¹⁴ Nasabtan n'yo ba ang buut kong ipasabot mahitungod sa mga demonyo? Nagapamuhat gyud sila. Ngani sila'y mga relihiyoso man kaayo, ingon ka relihiyoso gayud! Oh, nagasimba pud sila matag Dominggo, ginabalik-balik ang Kredo sa mga Apostoles, ug ginaawit ang Doxology. Oh, my, sila'y ingon ka relihiyoso gayud!

“Igsoong Branham, buut mo bang ipasabot nga Tinuod gyud kana?”

²¹⁵ Ingon niana baya nga matang sa espiritu ang nagpalansang kang Jesus Cristo sa krus. Ug miingon si Jesus, “Ang inyong amahan, mao ang yawa.”

²¹⁶ Karon ang uban kanila miingon, “Oh, ang Rusya man ang anticristo.” Dili gayud! Ang Rusya dili mao ang anticristo. Tungod ang anticristo mamahimo man nga relihiyoso kaayo nga malimbongan niini ang mismong mga Pinili kon mahimo pa.

Hinumdumi n'yo, ginakuha sa Dios ang Iyang tawo, apan dili ang Iyang Espiritu. Ginakuha pud sa yawa ang iyang tawo, pero dili ang iyang espiritu. Karon, ingon niana sila. Bahala na kamo. Katungdanan ko lang nga isulti ang Kamatuoran.

²¹⁷ Mga demonyo, nga nagapamuhat mismo! Kagahapon, gihisgotan ko sila diha sa pisikal nga kahimtangan. Karon, ang ginapakita ko kaninyo mao ang sa espirituhanon nga kahimtangan, kon diin anaa sila sa pang-relihiyon nga kahimtangan. Anaa sila dinha, nga ginatawag og kanser, ug ginatawag nila nga *ingon-ini*, *ingon-ana*, ug *uban pa*, apan

gipamatud-an ko kaninyo, pinaagi sa Biblia, nga mga yawa kana sila. Karon, dinhi, sa karon, ania na usab sila diha sa pang-relihiyon nga kahimtangan, nga ingon ka relihiyoso, og diosnon kaayo.

²¹⁸ Kung sugdan mo, sa paghunahuna, igsoon. Si Cain, ingon nga ang mismong sinugdanan niini, usa man siya ka relihiyoso kaayo nga tawo. Si Esau usa pud ka relihiyoso kaayo nga tawo. Si Judas usab usa ka relihiyoso gayud nga tawo. Mao nga relihiyon gyud kini. Dili kini ang kalibutan. Kondili anaa kini mismo sulod sa atong pundok. Bantayi n'yo kanang, demonolohiya! Siguro pagkahuman niini, sa laing higayon, basin mas makahisgot pa ako niini og diyutay. Nahapnan na man gud kaayo kita.

²¹⁹ Ayaw n'yo hukmi ang si kinsa man. Higugmaa ang tanang tawo. Kung dili n'yo mahimo nga mohigugma sa tibuok n'yong kasingkasing, kung ingon-ana wala pa gyud si Cristo diha kaninyo.

²²⁰ Didto sa Toledo, Ohio, miadto ako sa usa ka gamay'ng restawran. Duna ko'y usa ka lugar nga ginakan-an nako, usa ka gamay'ng lugar sa Dunkard, gamay'ng nindot nga lugar. Mga buutan pud kaayo sila didto. Pero niadtong hapon nagsira sa sila, para motabong og Sunday school. Ug tungod nagsira man lagi sila, mao nga kinahanglan ko pang motabok sa kalsada, ngadto sa usa ka gamay'ng kalibutanon nga lugar, ug misulod ko didto. Ug kabalo ko nga ilegal ang pagsugal didto sa Ohio. Ug atua didto'y usa ka pulis sa estado nga nagaagbay sa usa ka babaye, ang iyang kamot anaa na sa may dughan sa babaye, nga nagadula og slot machine. Nga ang balaod sa atong mga estado ug sa nasud, wala na gayud. Makaluluoy!

²²¹ Pero nagasalig gyud ako kang Cristo ang malig-on nga Bato, nga ako nagabarug, ang tanang ubang mga dapit balas na lang nga nagakaunlod. Wala na'y nahibilin pa. Tinuod kana.

²²² Milingi ako didto, ug dunay usa ka matahum nga batan-ong babaye, siguro anaa pa lamang sa iyang pagkadalaga, dise-nuebe, dise-otso, o dise-nuebe anyos ang panuigon. Ug ang ilang ginabuhat didto, niadtong mga batan-ong lalaki nga nakapalibot sa lamesa, mangil-ad gyud. Milingkod ko didto. Ug bueno nakurat ako, tungod nga sa ginalingkoran ko mismo dunay usa ka babaye ang miduol, miingon, "Gusto ba nimong molingkod?"

Ingon ko, "Salamat. Gusto ko og pamahaw."

²²³ Ug may nagalingkod sa usa ka lingkoranan, didto og usa ka tigulang na nga babaye, nga sama katigulang sa akong inahan, singkwenta'y-singko, singkwenta'y-otso anyos ang panuigon. Nagasul-ob siya niadtong mubo og malaw-ay nga bisti nga ilang ginasul-ob.

²²⁴ Ginaingon nila nga presko kono kadto. Ang ginaingon sa siyensiya, "Mga buang-buang kamo." Dili, gayud. Gusto lang

man ninyong ipasundayag ang inyong kaugalingon nga hubo. Makauulaw kana, kaulawan gayud. Pero ang usa ka ligdong nga gining dili man magsul-ob niana. Ang usa ka babaye mosul-ob siguro, apan ang usa ka ligdong nga babaye dili gayud.

²²⁵ Ug dayon, niadtong tungora sila...atua siya, nga nagalingkod didto. Ang luoy niyang lawas nangyatyat na. Nakalipstik siya niadtong usa ka matang sa manikyur nga mora'g orchid, o kon unsa man ang tawag n'yo niana, diha sa iyang mga ngabil. Ug mubo kaayo ang alot nga sama sa usa ka lalaki, nga pinatuskig; diin ginaingon sa Biblia, nga kaulawan gayud. Ug ang usa ka babaye, nga ang usa ka lalaki. . .

²²⁶ Ngani ginapamahayag sa Biblia, nga kung putlan sa asawa ang iyang buhok, nan ang bana adunay katungod nga biyaan og bulagan ang maong babaye, tungod kay dili man siya matitud-anon kaniya. Mao nga kinahanglan natong moanhi ug iwali ang Biblia dinhi usa sa niining mga adlaw. Gikaingon, “Kung putlan niya ang iyang buhok, nan ginapakaaulawan niya ang iyang bana.” Kung makauulaw man gani siya, nan angay gyud siyang biyaan. Hinoon dili ka puedeng makigminyo sa uban, apan mahimo nimong bulagan siya. Whew! Grabe, mabug-at kana, mabati ko man. Apan mao gyud kana ang Kamatuoran.

²²⁷ Oh, kaniadto, ginatuman gyud nato kana sa dihang anaa pa kita sa mga kahimtangan sa Espiritu Santo, apan gipaubos na man nato ang sukaranan. Ginaingon kaniadto sa usa ka tigulang nga igsoong lalaki, “Ginapaubos na nato ang sukaranan, ginapaubos na nato ang sukaranan, nagapakigkompromiso na kita sa sala. Ginapaubos na nato ang sukaranan, mao nga nakagawas ang karnero, apan giunsa man pagpakasulod sa mga kanding?” Gipaubos na ninyo ang sukaranan. Mao kana'y problema. Gipaubos na ninyo ang sukaranan, mao nga ang kalibutan ug ang iglesia nagkasagol na. Sama lang sa mga taga Moab ug uban pa, ug si Balaam, ug kung unsa nga nakigminyo siya kanila, eksaktong ingon niana sa gihapon sa karong panahon. Ug ang iglesia bug-os gayud nga nahugawan na, ug ang Pentecostal nga kapanahonan nga mao ang kapanahonan sa Laodicea, nagkadagaang na, ug gisuka na gikan sa baba sa Dios. Ug gikan sa maong tibukong nga pundok, pagatawgon sa Dios ang Iyang mga nahabilin, og dalhon Siya Pauli, eksakto gayud kana, eksakto, pinaagi sa pagkabanhaw.

²²⁸ Ug atua siya, nga nagalingkod didto, nga nakameyk-ap ang tibukong niyang nawong, ug nalukop kadto nga ingon niana. Ug aduna pud siya niadtong itum nga butang nga anaa ibabaw sa iyang mga mata, ug ginapaningot man siya, mao nga nagakalanay kadto. Ug ang makaluluoy nga babaye tingali'g aduna na siya'y mga kaapo-apohan. Ug nagalingkod siya didto kauban ang duha ka tigulang na pud nga mga lalaki, ug ang usa niadto dunay usa ka dakung panyo nga nakapalibot sa iyang liog, ug Hunyo kadto, nga atua didto. Ug mitindog siya, ug medyo

miinom og ilimnong-makahubog, ug miinom kadtong babaye, usab. Ug nagalingi-lingi siya.

²²⁹ Nahunahuna ko, “Oh Dios! Dios, nganong dili na lang man Nimo papason ang maong butang gikan sa mapa? Nganong dili man Nimo buhaton? Ang ako bang bata nga si Sharon . . . Ang akong gamay’ng anak, ang akong batang babaye nga si Sarah ug ang akong batang babaye nga si Rebekah kinahanglan bang magdaku sa ingon niini nga henerasyon, aron moatubang sa ingon nianang butang?” Nahunahuna ko, “Tana-awa dinhi sa niining mga parke ug mga ingon-anang butang, ug kung unsay nagakahitabo.” Nahunahuna ko, “Oh Dios! Oh, nalipay ko nga gikuha Mo si Sharon kung mao man kadto ang Imong kabubuton. Pero ang akong batang babaye nga si Rebekah ug ang akong batang—batang babaye nga si Sarah kinahanglan bang magdaku ilalum sa ingon niana nga butang?” Nga, ginatawag kadto sa mga tawo . . . nagaawit pa sa choir ug tanan na. Ug sa hunahuna ko, “Dili ba makauulaw kana?” Sa hunahuna ko, “Dios, giunsa ba nga maagwanta pa sa Imong Balaang pagkamatarung kini? Nga ang Imong matarung nga kasuko mora ba’g mobuto na dinha ug—ug pabuthon Mo na kini nga lugar.”

²³⁰ Ug nadungog ko ang Manulonda sa Ginoo, nga miingon, “Padaplin usa.” Milakaw ko didto dapit. Ug sa dihang nahuman na Siya sa ako, nabati ko nga daw sa lahi na ako nga tawo. “Para sa unsa ba nga ginahukman mo siya?”

Ingon ko, “Tan-awa kana, kung unsa siya.” Ug ania ang Iyang . . .

²³¹ Dayon nakakita ako og usa ka panan-awon. Nakita ko ang usa ka kalibutan nga sama *niini*, nga lingin, usa pa ka kalibutan. Apan kining kalibutan *dinhi*, adunay balangaw sa palibot niini, ug kana mao ang Dugo ni Cristo nga nagapanalipod sa kapungot sa Dios. Dili sa Niya mahimong tan-awon kadto, kay basin Iyang—Iyang laglagon hinoon ang maong butang dihadiha mismo, tungod kay Siya miingon man, “Sa adlaw nga kamo mokaon niini, kana nga adlaw kamo mamatay.” Busa buhaton gyud Niya kana.

²³² Dayon nahunahunaan ko ang ingon niini. Nakita ko ang akong kaugalingon. Bisan pa kon wala ko nagbuhat niana, apan usa gihapon ako ka makasasala, bisan pa man. Ug dayon ang Dugo ni Jesus Cristo ang nahimong mora’g pangsagang para kanato. Kita n’yo? Nga, sa dihang makasala ako, ginabunggo Siya sa akong mga sala ug ginatay-og ang Iyang bililhon nga ulo, ug makita ko ang mga luha Niya ug Dugo nga nagadagayday. “Pasayloa siya, Amahan, wala siya nahibalo sa kung unsay iyang ginabuhat.” Ug kon makabuhat ako og ubang butang ug igoon na pud Kini. “Pasayloa siya, Amahan.”

²³³ Kung dili Siya ang giigo niini, nan siguradong nalaglag na unta ako. Ug kung wala ko pa gidawat ang Iyang grasya, nan sa

adlaw nga ang akong kalag mopanaw nga lagpas na niana, nan hinukman na ako. Gisalikway na ako. Wala na gyu'y nahibilin pa kondili ang paghukom. Hinukman, hinukman na unta ako. Miingon ang Dios, "Sa adlaw nga kamo mokaon niini, kana nga adlaw kamo mamatay." Dihadiha nahukman na kamo. Kini mao ang lingkoranan sa paghukom karong hapon, depende sa inyong pagtagad kang Cristo.

²³⁴ Ug dayon nahunahuna ko, "Oo, husto kana." Ug nakita ko usa niana ka adlaw nga mikamang ako paingon Kaniya. Nakita ko ang akong daan nga libro nga napahimutang didto, nga ako usa ka makasasala, didto nahisulat ang tanan-tanan. Nakita ko nga ang akong mga sala ang maoy nagpahinungdan niadto, ug ingon ko, "Ginoo, mahimo Mo ba akong mapasaylo?"

²³⁵ Gibutang ang Iyang kamot sa Iyang kilid, miuha og diyutay'ng Dugo, gisulat kadto sa may ibabaw, ug ang ingon, "Gipasaylo na." Gilabay dayon ngadto sa dagat sa pagkalimot, aron dili na kadto madumduman pa. Nawala na kadto hangtud sa kahangturan! Ingon Siya, "Gipasaylo Ko ikaw, apan siya imo mang ginahukman."

Kadto ang nagpausab sa akong hunahuna. Ingon ko, "Ginoo, malooy Ka."

²³⁶ Human nga migawas ako niadto, miduol ako didto ug milingkod. Ingon ko, "Kumusta ka, ma'am?"

Ingon siya, "Oh, hello."

²³⁷ Ug ingon ko, "Kung pasensyahan ko nimo," ingon ko, "Ako si Rev. Branham, usa ka ministro."

Ingon siya, "Oh, pasensya na. Pasensya na, Rev. Branham."

²³⁸ Ingon ko, "Babaye." Gisultihan ko siya sa maong estorya. Ingon ko, "Nagatindog ako kaganina dinha, ug ginahukman ta ka, ug nagahunahuna, 'Pagkamalaw-ay nga butang!' Siguro aduna ka'y mga anak."

Ingon siya, "Oo naa."

²³⁹ Ingon ko, "Unsa ma'y nagpahinungdan nga mipaingon ka sa sayup?" Gisugdan niya pagbutyag ang usa ka estorya nga makapahugno sa kasingkasing ni kinsa man. Ingon ko, "Ako—gipangutana ko ang Dios kon nganong dili na man lang Niya papason ang ingon niana. Ania, ania ka nga kauban kanang duha ka hubog nga lalaki, ug hubog pud ka, mismo." Ug ingon ko, "Sa umaabot nga adlaw... Kana nga Dugo mao ang nagapugong sa kapungot sa Dios pahilayo kanimo. Mamatay man ka usa sa niining mga adlaw. Ug, dayon, ikaw'y—aduna ka'y gawasnon nga kinaugalingong kabubut-on karon, nga mahimo kang mobalibad o modawat." Ingon ko, "Apan moabot ang adlaw nga ang imong kalag molagpas didto, kon diin wala na'y kalooy nga nahibilin. Ug kung mamatay man ka nga anaa pa

diha sa imong mga sala, nan hinukman ka na, ug mopaingon ka sa impierno.”


²⁴⁰ Kabalo ba mo kung unsa? Kadto nga babaye miluhod niadtong lingkoranan didto sa restawran. Nagkaaduna kami og panagtigum sa pag-ampo nga wala pa ninyo sukad-sukad nadungog sa tibuok n’yong kinabuhi, ug miduol siya kang Cristo. Unsa man kadto? Ayaw n’yo sila hukmi; sultihi hinoon sila sa Maayong Balita. Tungod gipangyawaan man sila; mga mortal lang nga ania niini nga kahimtangan. Naimpluwensiyahan sila gikan dinhi. Pero ang atong impluwensiya nagagikan sa kahitasan. Mao nga tan-awon nato kung unsa ba’y mahimo natong buhaton pinaagi sa atong mga talento, aron makabig ang uban paingon kang Cristo.

²⁴¹ Langitnon namong Amahan, ginapasalamatan Ikaw tungod sa Imong kamaayo ug kalooy. Pasayloa ako, Ginoo; tingali’g, ang mga tawo, nalangan ko sila pag-ayo. Apan ingon nga pagtapos sa niining pang-hapon nga mga panagtigum sama niini, gitinguha kong sultihan sila bahin sa, “mga demonyo,” ug nagutad-gutad ko kini og ayo diha sa usa ra, sa usa ra ka pagwali, apan tingali’g makuha ra nila kini, dinhi ug didto, ug masabtan kung unsa gyu’y buut kong ipasabot. Nasayod Ka sa mga katuyoan sa akong kasingkasing, mahitungod sa pagpahayag niini.

²⁴² Hinaut nga managpanguli ang mga tawo gikan dinhi karong hapon, ug nga bantayan unta sa mga kalalaken-an ug mga kababayen-an ang ilang matag lihok, og magkinabuhi nga malipayon ug gawasnon. Hinaut nga masayran nila nga giluwasa sila sa Dios. Ug hinaut nga motan-aw sila nganha Kaniya, og hikalimtan na ang bahin sa tanang mga ismo ug mga ingon-anang butang nga anaa sa palibot nila, ug magkinabuhi nga malinawon ug maligdong, ug may kahadlok sa Dios. Ug dayon, Dios, sa diha nga gusto Mo silang gamiton alang sa unsa mang butang, mahimo Mo nga direktang makigsulti kanila ug ipadala sila sa kon asa Mo man gusto nga moadto sila o kon unsa man ang gusto Mong ipabuhat kanila. Hinaut nga magmapainubsanon ang mga tawo ug makaplagan si Cristo diha sa ilang kasingkasing. Pasayloa kami, Ginoo, sa among mga kakulangon, ang matag usa kanamo.

²⁴³ Ug nasayod kami nga—nga si Satanas nagalibot-libot sama sa usa ka leon nga nagangulob, sa bisan asa, nga ginatukob ang unsa man nga iyang matukob, nga nagasul-ob og pang-relihiyon nga mga kupo. Oh Dios, kining makaluluoy’ng mga anak, tan-awa sila, sa bisan asa. Ingon nga sila’y abli ug dayag sa mga tawo. Ug ginaampo ko Kanimo, Dios, nga magmaloloy-on Ka kanila, ug luwasa ang tanang nahisalaag, og ayoha ang mga may sakit. Ug, Dios, naamgo namo nga kining mga yawa nga balatian nga nagaabot sa Imong mga anak, nga aduna Ikaw og usa ka pangbayad nga atua ra didto, aron mao’y moatiman niana. Ug sa tanang mga yawa nga magpahinungdan kanila nga makasala,

aduna sàb Ikaw og pangbayad-sa-sala nga napahimutang didto, nga mao'y moatiman niini. Ug ginaampo ko nga itugot Mo unta kini sa Ngalan ni Jesus. Amen.

Nahunahuna ko kung aduna ba kaha'y . . . 

53-0609A Demonolohiya—Pang-relihiyon Nga Kahimtangan
Roberts Park Amphitheater
Connersville, Indiana U.S.A.

CEBUANO

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org